

## الفصل الاول

## "باستیت"



أنا كارمن, هقولك عنى 5 اسرار محدش يعرفهم

الاول ... بسمع افكار اللي قدامي .وهعلمك أزاى تسمعها زبي

التاني .... قتلت امي وأنا عندي 11 سنه ,ومحدش يعرف.

التالت .... بسكن جسم قطى وبشوف بعينه وبسمع بودانه.

الرابع .... قررت أقتل كل خاين في حياتي

الخامس .... بيقولوا عليا مجنونه!!!

أنا "كارمن ياسين عوده" عندى 21 سنة ,البنت الوحيده لياسين عوده صاحب أكبر مصانع وخام وجرانيت , ومن أغنى رجال الاعمال في مصر , بابا مش زى أى راجل أعمال تعرفه , بابا محدش في مصر كلها يعرف شكله!!

تشوف أسمه فى كل الجرايد بس عمرك ماهتلاقى صوره ليه , تعرف ليه !!؟ هقولك ليه بس مش دلوقتى....

وانا عندى 11 سنه بدأت أسمع الكلام اللى بيدور فى مخ أى بنى آدم واقف قدامى, من غير ما يقوله على لسانه , هتقول عليا مجنونه , هقولك أنى بدرس لغة الجسد من وأنا صغيره علشان أتأكد من اللى بسمعه .... مش بس كده هعلمك أزاى تسمع أفكار اللى قدامك...

هعلمك تكشف خداعهم وكدبهم...

الانسان بيكدب بلسانه .... بس جسمه لأ .... مابيعرفش يكدب...

بينوكيو أنفه بتطول لما بيكدب, ده بالظبط اللى بيحصل للى قدامى لما بيكدب, الكدب بينوكيو أنفه بتطول لما بيكدب, ده بالظبط اللى بيعلى ضغط الدم, وضغط الدم بينفخ ألانف وبيهيجها وبيخلى اللى قدامى عايز يهرش أو يحك ايده فيها, لما بلاقى حد بيحك في أنفه وهو بيتكلم بعرف أنه بيكدب.

الخدود والودان برده بتحمر من ضغط الدم ,لما ألاقى اللى قدامى خدوده أو ودانه حمرا وهو بيتكلم بعرف أنه بيكدب عليا.

الشفایف, لو اللی قدامی عض شفایفه وهو بیتکلم, أو لو شفایفه نشفت وأضطر یرطبها بلسانه بعرف أنه بیکدب.

الحواجب واللى بتترفع لفوق, فرك الصوابع فى بعضها ,العين اللى رموشها بترفرف كتير ولما بؤ بؤ العين بيروح ناحية اليمين , بعرف أن اللى قدامى بيتخيل الحاجه مش بيفتكرها . عينه بتحود يمين تلقائى, علشان بيستدعى المعلومات من نص مخه اليمين واللى مسئول عن الخيال , مش الحقيقه....

بسمعهم وهما بيكدبوا في سرهم وبشوف علامات كدبهم على وشهم.

قتلت أمى وانا عندى 11 سنه...

بابا ياسين عوده أبن أصول أبا عن جد, جدى كان باشا أيام الملك فاروق كان عنده من الاطيان اللي لو مشيت فيها على رجلك هتحتاج شهور علشان توصل لاخر حدودها.

بابا درس فى كليه سياسه وأقتصاد جامعه القاهره وحب " هند" زميلته فى الكليه ...أمى واللى من عيله واطيه وعره من قاع المجتمع , كانت عايشه فى منطقه شعبيه جمب الجامعه , وعمرها ماكانت تحلم تتجوز شاب مثقف ومتعلم وأبن أصول وثرى وفوق ده كله بيحبها , وأتجوزها وهما فى تانيه جامعه بعد ما أتحدى عيلته كلها علشانها!!

أتغير بعدها حال أمى هند واللى كانت بتروح أول سنه الجامعه بهدوم مهلهلة و جزمه مقطوعه , بقت بتروح الجامعه وهيا راكبه أحدث العربيات اللى في السوق,

بابا أداها شركات تديرها , وعملها سيدة أعمال وخلاها بنى آدمه تانيه , بس هيا حيوانه....

بدل ما تخلصله, وتعيش خدامة تحت رجله وتعبده ... خانته !!! ومع مين مع واحد عره شبهها , جارها من وهيا صغيره.

واللى عينته سفرجي في الفيلا بتاعتنا علشان يبقى جمبها.

فى يوم كنت نايمه فوق فى أوضى , وكانت أول مره ليا أشوف بعين قطى " باستيت" وأسمع بودانه.

باستيت كان في المطبخ, تحت السفرة بياكل, شاف أمى وهيا داخله المطبخ وبتحضن

السفرجي من ضهره وبتبوسه, لف السفرجي وحضنها وباسها وهو بيقولها:

وحشتيني يا.... (لفظ قبيح وسوقي)

ومارسوا خيانتهم فوق السفره اللي تحتها باستيت!!!

صحيت من نومي على أصواتهم اللي سمعتها بودن باستيت قطى, نزلت جرى من أوضتي

وفتحت باب المطبخ براحه وشوفتهم من غير مايشوفوني!!!

أمى خاينه .... خانت بابا اللي حبها .... أمى تستاهل الموت..

قررت ماقولش لبابا علشان ماينجرحش ... و أخد حقه , وأغسل شرفه من غير مايعرف.

وفي يوم أجازة الخدامين في عيد الفطر خدت الطياره الورق بتاعتي

ونزلت لهند واللي كانت قاعده على الكنبه وبتلعب في خصل شعرها وهيا بتتكلم في التليفون

مع السفرجي , مكانتش مستحمله فراقه أيام الاجازه!!

```
قولتلها:
```

ماما ممكن تطلعي معايا فوق ع الرووف علشان نطير الطياره.

قالتلى وهيا بتحط أيديها على سماعة التليفون:

خلى أنيتا الشغاله تطلع معاكى..

زنيت عليها وقولتلها:

أنا زهقت من أنيتا على طول هي اللي بتلعب معايا .... أنتي ليه مش بتلعبي معايا خالص ؟!!!

وعيطت...

صعبت عليها وضمت شفايفها على بعضها وقالت:

أمممم ياحرام .. خلاص متزعليش ياكارمن ... هطلع معاكى.

طلعنا فوق الدور التالث ع الرووف وقعدت على كرسى من اللي موجودين قدام البسين اللي

ع الرووف , وبرده كانت مشغوله و بتتكلم في التليفون وبتضحك وهي متجاهلاني!!

محاولتش حتى تسلك حبل الطياره وتطيرها معايا!!!

أستغليت أنها مشغوله في التليفون وشبكت حبل الطياره في حديده على طرف السور القصير اللي في الرووف.

وناديت عليها وأنا بعيط تيجي تساعدني علشان نسلك الحبل من الحديد.

وطت علشان تسلك الحبل وهيا ماسكه التليفون بتتكلم فيه برده.

بصيت حواليا مالقتش حد شايفني ,فزقتها من فوق الرووف وقعت على راسها أتفشفشت فوق رخام الارضيه وماتت.

سلكت طيارة الورق بتاعتي , ورجعت حطيتها في أوضتي , ونزلت شغلت التليفزيون

بصوت عالى, فطلع صوت اغنية بتقول:

انا القمر اللي جلي ظلمه الليل ... وانت الكسوف اللي رجعه

وعد مني لو قابلت خاين زيك في الحياة .. أودعه

أتعلمت منك والحياة تجارب .. ولو سلمت من عض الافاعي أبدا مأنام على ضهر العقارب.

حبيت الاغنية اوى وحسيتها صدفة غريبة فقررت اخليها انشودتي....

النهارده يوم جوازى على آدم واللي من نفس المنطقة اللي أتولدت فيها أمى.

آدم زميلي في كلية الاعلام وقالي أنه حبني علشان شخصي مش علشان فلوس أبويا, آدم من

عيله عره زي أمي , أتجوزته علشان أعجبت بيه طبعا , وعلشان أشوفه هيخوني زي أمي

ماخانت أبويا ولا لآ!!!!! , ولو خان هسمع أنشودتي.... أنشودة كارمن..

الفصل الثاني "على عش الحب"



قضينا شهر العسل في المالديف ... على حسابي طبعا.

مش هحكيلك على الفتره الاولى ولا على الفطار اللى بيجى لحد السرير والبوسه اللى على خدى وأنا نايمه علشان أصحى , وأحلى صباح الخير ياحبيبتى , علشان كل الرجاله بيعملوا كد

وم الصباحيه واول يومين, هحكيلك على خيانته واللى حصلت بسرعه بعد شهرين بس من
عوازنا!!!
ئانت حوالى الساعه 2 باليل وكنت نايمه ولقيته بيتسحب من جمبى , ونزل تحت , وقتها كان
طى باستيت نايم في الجنينه اللي قدام البسين وصحى لما سمع صوت عند البسين وشاف
دم وهو بيقعد قدام البسين و سمعه وهو بيتكلم في التليفون!!
سمعته بودن قطى وأنا نايمه فوق وهو بيقول:
وه ياحبيبتي!!!!
خمدت فوق
ه أنا بخاف منها.
بدا والله ياحبيبتي أنتي عارفة أنا متجوزها ليه.

طبعا أول ما أستفاد من علاقاتها وعلاقات أبوها وأنشر رواياتى و أعمل الدعايا الصح هخلع منها على طول ... بقولك مجنونه.

يابت ده أنتى اللى في القلب.
كام شهر والله وه
قطع كلامه وأتخض لما لقانى واقفه وراه
فعمل نفسه بيتكلم مع حد تاني في التليفون وقال في السماعه وهو متوتر:
كام شهر والله وهبعتلك الروايات التانيه ماشي ياحاج عبد العال وده وقت برده ياعم
عبدالعال للكلام ده سلام
بصلى وكان متوتر وقال:
ده الحاج عبد العال اللي ماسك الشغل في المطبعه اللي هتطبع الكتب
حك أنفه!!!
بيسألني على باقي الروايات علشان عايز يطبع الروايات كلها مع بعضها
شفايفه نشفت وبلها بلسانه , عينه بترمش كتير!!!
بيقول ياستي علشان الاصطمبات وكده , حاجات كده مش هتفهميها
ودانه حمرا وعينه راحت ناحية اليمين!!!

لما لقيته بيكلمني خدت التليفون وطلعت بره الاوضه علشان ماصحكيش ياقلبي!!

حك أنفه تاني وعض شفته!!!

ماتيجي بينا نطلع فوق ياقلبي..

قولته:

ماتسبنیش لوحدی تانی علشان بخاف.

طوق دراعاته حوالين وسطى وقالى وأحنا طالعين أوضه النوم:

أبدا ما هسيبك لوحدك ده أنتي صدري اللي بتنفس بيه, وقلبي اللي بيدق ومخليني عايش...

عدى يومين على اكتشافي خيانته ليا, وجيه يوم الاختبار الحقيقي, قولتله وأحنا بنتعشى:

بيي أنا زهقت أوى من الفيلا.

ساب الشوكه اللي بياكل بيها من أيده.

حط أيده فوق أيدى وطبطب عليها وقالى:

خلاص نبقی نخرج نتعشی بره بکره.

قولتله:

لآ أنا زهقت من القاهره كلها .... ماتيجي نروح الشاليه بتاعنا اللي في الساحل ؟!!

قالى:

حبيبتي أنتي عارفه أنا مشغول في طباعه الروايات و.....

قطعت كلامه وقولته وانا مرفعه صوتى:

بليز بقى يابيبي نفسي أغير جو

قالى وهو مغلوب على أمره

اللي تشوفيه ياحبيبتي.

قولتله:

أوكي هطلع أحضر الشنط علشان نبقى هناك قبل الفجر!!!

مستنتهوش یدی رد فعل وطلعت علی فوق حضرت الشنط.

طلعنا بالعربيه على طريق اسكندريه الصحراوي, وكان تقريبا أحنا بس اللي على الطريق.

حطيت أسطوانه وشغلت أغنيه فطلعت موسيقي و صوت شاديه وهي بتقول:

على عش الحب وطير ياحمام, على عش الحب... الحب

ريحت راسي على كتفه وهو سايق.

عارفين سكتنا سوا .... وهنوصل بيتنا سوا ااااااا....

ونام ونقوم ونقوم وننام على حب في ح.....

قطع صوت الاغنيه العربيه اللي دخلت فينا وخلتتا نخرج بره الطريق ونغرز في الصحرا.

بصينا حوالينا لقينا أربع عربيات دفع رباعى وقفوا ,وحاوطونا ونزل منهم حوالى 10 رجاله فى أيديهم سنج وبيقربوا علينا!!

قولنالهم:

فيه أيه !!!! أنتوا عايزين منننا أيه!!!!

مردوش علينا

طلعونا بره العربيه وهما رافعين علينا رشاشات ومسدسات ووقفونا في الصحرا جمب بعض وخلونا نرفع أيدينا.

واحد منهم قرب علينا كان لابس جاكيت جلد وفي أيده سنجه طويله, وبيشرب سيجاره وباين عليه الريس بتاعهم, قرب مننا لحد مابقى واقف قدامنا بص عليا لوحدى من فوق لتحت وبعدين بص على آدم لوحده.

فآدم قاله وهو خايف وبيبصلى:

لو عايز فلوس .. هنديك فلوس كتيره بس متأذيناش.

نفخ أبو جاكيت اخر نفس من سيجارته في وش آدم ,وكرمش السيجارة في أيده وطفاها وبعدين رماها في الهوا وراح ضارب أدم في سنانه بنفس الايد.

فوقع أدم على الارض وهو ماسك بوقه اللي بيجيب دم.

قاله ابو جاكيت وهو بيبصلى بأشتهاء:

لا أحنا عايزين الحلوه دى .... من الآخر .. واحد بس هيعيش يا أنت ... ياهيا....

لو قاوحت هنتقتلك وهناخدها بالعافيه.

أنما لو طلعت بتفهم ونفدت بجلدك هناخدها برده بس أنت هتعيش ... قولت أيه ؟

قبل ما أقولك أدم قاله أيه تعالا أقولك مين دول!!!!

فلاش باك من 3 سنين

من حوالى 3 سنين كنت راجعه من الشاليه وكان الوقت متاخر برده وأنا سايقه العربيه على الصحراوى, طاردتنى عربيه بى أم حديثه كان فيها 3 شباب سكرانيين, وشكلهم كانوا نازلين من الساحل على القاهره.

فضلوا يطاردوني بالعربيه لحد ما خبطوني من ورا.

فالعربيه بتاعتي لفت بيا وغرزت في الرمله!!

وقفوا عربيتاهم ونزلوا منها, قفلت الازاز و باب العربيه عليا, فضلوا يخبطوا على العربيه.. حاولت أتصل بالبوليس بس موبايلي كان شحنه خلاص قرب يخلص ومكنش فيه شبكه, حاولت القط أي شبكه وانا في العربيه أيدى بتترعش ومرعوبه.

الموبايل فصل شحن!!

بيخبطوا على عربيتي جامد وعلى الازاز وبيحاولوا يكسروه.

دوست بنزين جامد فالعربيه غرزت أكتر.

وطيت أحط الموبايل في شاحن العربي.....

بس سمعت صوت أزاز العربيه وهو بيتكسر.

جابوا الكوريك اللي بيرفعوا بيه العجل وكسروا الازاز بتاع عربيتي.

فضلت أصرخ بس كنا في وسط الصحرا, طلعوني بره العربيه, قعدت الطش فيهم و أضريهم بأيدى وأخربشهم بضوافرى, وقعوني على الارض وبدأو ضرب فيا برجليهم فضلوا يشوطوا فيا كانهم بيشوطوا كوره.

كنت بصرخ وبصوت وبنادى على حد ينجدنى لحد ماصوتى ضعف من كتر الضرب وبقيت أكح دم !!!وبدأت أغيب عن الوعى

واتفقوا على مين اللى هيبدأ ونزل أتنين ثبتوا أيدى ورجلى ,وأتملكوا منى غمضت عينى لان كان خلاص هيغت....

لقيتهم وقفوا فجأه !!!! وبيصرخوا من الالم!!!!

فتحت عينى لقيتهم متكومين جمبى و فى عشر رجاله فى أيديهم رشاشات آلى بيضربوا فيهم برجليهم و بقاعدة رشاشتهم!!! قرب عليا واحد منهم لابس جاكيت أسود وفي أيده سنجه طويله

بص عليا وانا هدومى مقطعه وبعدين شاور لواحد جمبه واللى راح ناحية عربيه من عربياتهم ورجع ببطانيه, وأزازه ميه أداهم لابو جاكيت في أيده.

أبو جاكيت غطاني بالبطانيه , وأداني أزازه الميه علشان أشرب وأغسل الدم اللي مغرق وشي.

خدتها منه وأنا أيدى بتترعش ومش قادرة أحركها لفوق من الألم, فساعدنى وسند أيدى ورفع معايا الازازه ......لحد ما شربت منها.

بصلی وهو ماسك الازازه بیستأذنی بعینه أنه یمد أیده و یغسل وشی من الدم, فهزیتله راسی بالموافقه, فمد أیده وغسل وشی, كنت بتألم وأرجع لوراكل ما یلمس جرح أو كدمه فی وشی, غسل اللی یقدر علیه من وشی بس لسه بیجیب دم.

قومني من على الارض وسندني شويه, بعدين شاورتله يسبني أقف لوحدي.

شاور على التلاته المتكومين وقالى:

عايزانا نعمل معاهم أيه ياست البنات .... نقطعهم ولا نضريهم بالرصاص ؟

صرخت و انا جسمى كله بيترعش وقولت:

عايزاهم يدفنوا بالحيا!!!!

شاور بصباعه على عينيه الاتنين وقالى:

مش بس كده ياست البنات , هخليهم يحفروا قبورهم بنفسهم كمان.

وشاور لرجالته علشان يجرجروهم لجوه في الصحرا.

قالى:

أرتاحي أنتي في عربيتك و متقلقيش أحنا هنخلص.

قولتله:

لا أنا عايزه أشوفهم وهما بيتدفنوا قدامي.

انحنى بضهره و فتح دراعه كأنه بيوسعلى الطريق.

مشيت قدامه وانا لفه البطانيه على جسمى.

جابلى 3 كاوتشات أستبن من العربيات اللى معاه ورصهم فوق بعض وحط عليهم بطانيه تانيه , ومد أيده وقالى:

أتفضلي أقعدى ياست البنات.

قعدت على الكاوتش أتفرج علي ال3 اللى كانوا عايزين يغتصبونى وهما متهددين بالرشاشات, ومجبر كل واحد منهم يحفر قبره بأيده, كل ماواحد منهم يتكاسل أو يوقف حفر يلاقى سنجه بتشرط في جسمه من ورا, تجرحه جامد بس ماتموتهوش

حفروا قبورهم .. فكتفوا أيديهم ورجليهم من ورا ورموهم قدامي قبل مايدفنوهم

فضلوا يترجونى أسامحهم وفيه منهم اللى أنكب على الارض بيبوس رجل أبو جاكيت وبيعرض عليه فلوس أبوه الكتيره.

فضلوا يعيطوا زى العيال الصغيره وفيه منهم اللي عمل حمام على نفسه.

شاورت لابو جاكيت يخلص فزقوهم في الحفر و نزلوا التراب عليهم, شوفتهم والتراب بينزل على وشهم وبيخش في عنيهم وبوقهم, شوفتهم وهما بيكحوا التراب قبل مايتردموا بيه!! وصلنى بعدها أبو جاكيت لحد الفيلا وشدوا عربيتي معاهم

أول ماوصلنا الامن اللي على الفيلا رفع سلاحه في وشهم بعد ما شافوني وانا خارجة من العربية بالبطانية ووشى كله كدمات ودم!!

زعقت في أمن الفيلا وأمرتهم ينزلوا سلاحهم.

قولت لأبو جاكيت يدخل الفيلا هو ورجالته, كان رافض وكان عايز يمشى بس وافق بعد ما أصريت.

أستضفت كل رجالته ودخلتهم جنينة الفيلا وأمرت كل الطباخين والخدم يشوفوا طلباتهم ويأكلوهم أحسن أكل.

أبو جاكيت هو بس اللى دخل جوا الفيلا, قعدته فى الرسيبشن, وطلعت فوق غيرت هدومى بسرعه, وبصيت على وشى فى المرايا واللى كله كدمات ومزرق.

روحت الخزنه وفتحتها وطلعت كل الفلوس اللى فيها, مش عارفه كام بالظبط بس تقريبا يعدوا المليون جنيه.

وحطتهم في شنطه ونزلت اديتهم لابو جاكيت واللي رفض ياخدهم وقال:

عيب عليكي ياهانم أحنا معملناش كده علشان الفلوس ... والله زعلت.

قولتله:

دول مش علشان أنقذتني ... دى شهامه منك ومالهاش ثمن.

الفلوس دى علشان خليتك تقتل اللى أعتدوا عليا.

قالى:

لا ياهانم أنا اللى عرضت عليكى نقتلهم ... مش أنتى اللى طلبتى ... اعتبريهم أتقتلوا فرى ....مجانا يعنى

قولتله:

أنت أسمك أيه ؟!!

قالى:

الكردى

قولتله:

بص یاکردی أنا هحتاجك معایا , وأعتبر دول عربون شغل.

قالى:

أولا ياهانم أنا مش لوحدى ومباخدش عربون من ورا رجالتى لازم رجالتى يكونوا عارفين أنا واخد أيه و ليه !!! وكل حاجه بقسمها معاهم , اللقمه والعيشه والجبايه.

عجبنى أوى الكردى وعجبتنى أخلاق المجرم اللى فيه وخدت رقم تليفونه, ساعات كنت بأخده معايا وأنا رايحه مكان بعيد علشان يأمنى.

نصيحه لو محتاج حد يحميك .....هات بلطجي,

البلطجى بيعرف يستخدم السلاح وقلبه ميت وعنده تجربه, اوعى تجيب شركات أمن, دول بيبقوا موظفين.

كلمت الكردي وقولته يجيب الرجاله علشان عندهم طالعه.....

و دلوقتي الاختبار الحقيقي لآدم, هل هيدافع عني ولا هينفد بجلده؟!!

الفصل الثالث " ريشة سودا"



كلمت الكردى وقولته يجيب الرجاله علشان عندهم طالعه..

و دلوقتى الاختبار الحقيقى لآدم, هل هيدافع عنى ولا هينفد بجلده أدم قال للكردى وهو لسه ماسك بوقه اللى بيجيب دم.

مش هتسفاد حاجه لو قتلتنا, بلع ريقه وكمل كلامه وقال:

خد الفلوس وروق بيها على رجالتك.

طلع الكردي مسدسه وقاله:

هعد لحد 3 لو مجريتش هضريك بالرصاص.

1 .....الكردى شد أجزاء مسدسه.

2 ......أدم رجله سبقت رجله التانيه وهو واقف مكانه.

3 ...... أدم خد نفسه وجرى , بصلى كردى وقال:

طلع خاين ياست البنات.

وضرب رجل أدم اللى بيجرى بالرصاص من غير حتى ماينشن عليه كان باصص عليا وهو بيضريه بالنار ... متمكن الكردى!!

وقع ادم على الارض وكان بيسحف على بطنه , مشيت جمب الكردى لحد ماوصلناله فسمعته بيقول:

أنتى متفقه معاهم !!! , يابنت..... , أنتى.....

ضریه الکردی بجزمته وهو بیقولی:

هنعمل فيه أيه ياست البنات ؟!!!

قولتله:

أكيد هنقتله ياكردي...

وبصيت لادم اللي على الارض وقولتله:

شوفت يابيبي ... أنا هطلع أحسن منك هقتلك وانت خاين, وأقول أنك مت وأنت بتدافع

عنى , هموتك بطل مع أنك خاين...

رد عليا بعصبية:

انتى مجنونة .. يا بنت ال...

بصيت للكردى وقولته:

خلص ياكردي.

فرغ الكردى رصاص مسدسه كله في جسم أدم.

بصيت لادم لحد ماطلع أخر نفس ليه , بعدها قولت للكردى:

أضريني على وشي ياكردي..

بصلى بأستغراب وقال:

لا ياهانم انا عمرى ما امد ايدى على حرمه.

```
قولتله:
```

أنا اللى بطلب منك تضريني !!!..... لازم تضريني علشان أحبكها وأقول أنه مات وهو بيدافع عنى.

قال:

ولو ... أبدا...

قلتله:

هديك مليون جنيه في قلمين جامدين يزرقوا وشي.

قال:

ولا كنوز الدنيا كلها ... أنا أمى محلفانى ممدش أيدى على حرمه .... غير أن ده مش سلونا..... أحنا مبنمدش أيدينا على الحريم

قولتله:

أوكى ناديلي على الرجاله صف هنا.

نادى عليهم فقولت:

بليز يارجاله , عايزه حد يديني قلمين على وشي يكونوا جامدين , وهياخد على القلم الواحد مليون جنيه , بشرط القلم يزرق وشي.

سمعتهم كلهم بيرفضوا في صوت واحد, بصيت للكردى واللى كان فخور برجالته, شويه ولقيت واحد منهم واقف ورا خالص رافع أيده وكان أرفع واحد فيهم وقالى:

انا موافق یا ست.

وقال للكردى:

معلش ياريس هيا اللي طلبت ودول 2 مليون, وكمان أنا بضرب مراتي عادى..

الكردى تف على الارض وكذلك كل الرجاله, عدى من وسطهم علشان يوصلى.

فيه منهم اللى شتمه بشتايم فظيعه بأمه وأبوه, كانت اقل شتيمه أتقالتله يادنى !!! يعنى يا دنيئ تقريبا.

قرب عليا ونفخ في أيده وراح ضاربني قلمين ... أها هما وجعوني ,بس ماحستهمش كفايه , فقولته:

أديني بوكس كمان ,أصل أيدك طريه أوى

كلهم قعدوا يضحكوا معرفش ليه!!!

فقالي وهو محرج:

بس البوكس ده ليه حساب لوحده ياهانم.

زام عليه الكردي وقاله:

في أيه يابن الكلب أنت أستحلتها.

خاف الواد وارتعب وأداني بالبوكس في وشي.

خدوا نفسهم ومشيوا وفضلت أنا وعربيتى وجثة أدم على الطريق, قعدت في عربيتى وطلعت أسطوانه وشغلتها فطلع صوت أنشودتي وهي بتقول:

أنا القمر اللي جلى ضلمه الليل وأنت الظلام اللي رجعه.....

أستنيت لحد الصبح قرب يطلع وقطعت هدومي وقعدت على الطريق أعيط.

شاورت لاول عربيه كانت معديه الصبح فوقفت, كان راكب فيها رجل كبير في السن فقالي وهو مخضوض:

خير يابنتي في أيه ؟!!

قولتله وانا بعيط وصوتى بيقطع:

ناس طلعوا .... علينا .... سرقونا .... قتلوه جوزى ... حاولوا ... يغتص...

نزل بسرعه من عربيته وقعدني فيها.

وراح بص على جثة آدم وطلع تليفونه وكلم البوليس.

بعدها الدنيا أتقلبت والصحافه والتليفزيون أتكلموا عن الموضوع.

وكان تريند ساعتها, وهاشتاجات طلعت منها

#حق أدم السيد

#شهيد الشرف

شويه والدنيا رجعت تانى وكأن شىء لم يكن , طبعا بعد ماعشت شهرين كلهم تحقيقات شرطه, وضغط الصحافه ,ده غير أن ادم كان ليه أخت كانت عامله دوشه كبيره وعايزه توصل للجناه , فقررت بعد كده لما أتجوز أتجوز واحد يكون مقطوع من شجره مالوش أهل ومش شرط يكون فقير أو غنى أهم حاجه يكون جوازنا عرفى علشان دوشه الصحافه والاعلام. روايات أدم كسرت الدنيا , موته على أنه شهيد الشرف رفع مبيعات قصصه ورواياته لدرجة أنى فيه روايه وصل عدد طبعاتها ل50 طبعه.

كان أسمها "شهيد الحب"

بعدها بسنه أتجوزت واحد تانى وده بقى كان بيخونى علنى كده وببجاحه , كان بيسهر فى ديسكوهات لوش الصبح، وبيصرف فلوسى على ستات زباله من عينته , وبيضربنى لو أعترضت, طبعا جرجرته والكردى خلص ... بعد ما أصريت أنى أدفنه حى , و كأن شيئا لما يكن

.

هعدى معاك كام صفحه لرجاله كلهم طلعوا فلصوا عند أول أختبار حقيقي.

فيه منهم اللى جرى قبل ماكردى يعرض عليه وفيه اللى جرى أول ماشاف الهجوم أصلا وكلهم أتدفنوا ومحدش يعرف عنهم حاجه.

هقف معاك على صفحتين واحده مهمه , والتانيه أهم صفحه في حياتي.

الصفحه المهمه لراجل أتجوزته , أسمه " وسيم " كان بيعاملنى برومانسيه جميله , كان بيعاملنى برومانسيه جميله , كان بيرفكت , ترى شيك , ممشوق القوام ,مهتم بمنظره وبشكله , كان جنتل معايا جدا مش بسكده كان على طول بيجيبلى هدايا غاليه ومن فلوسه.

كان متسير الحال وعنده محل ذهب في وسط البلد, روحتله أكتر من مره المحل وراقبته و قريت أفكاره وهو بيتعامل مع ستات, كان بيتعامل بكل أحترام ومفيش مره بص لواحده بصه مش مظبوطه, بالعكس كان فيه ستات بتتدلع عليه وكان بيصدها جامد!!

مخلص جدا, وبيحبني أوى...

بس الحلو مابيكملش وكانت فيه مشكله بسيطه فيه وهيا .....أحم أحم أكيد فهمت أيه المشكله , مش هقدر أوضح أكتر من كده ي... ي...

في الاول كنت مفكراها مشكله عاديه أو حاجه هتاخد وقتها وتعدى.

كما أن دى مش مقياس الرجوله عند الراجل .. مش زى ما كل الرجاله فاهمه ... الرجوله مواقف وحنيه وأحتواء.

بس الموضوع كان مثير للفضول بالنسبه ليا, خاصة بعد ماقريت أفكاره ولاحظت حركات في جسمه بتنم عن الرغبه لما بيشوف جسم راجل!!!, وللاسف تأكدت ومش هقولك أزاى أنه مش مهتم بالستات أصلا وأنه كان متجوزني علشان يغطى أفعاله اللي مش كويسه مع واحد صاحبه.

مكنتش عارفه اعتبرها خيانه ولا لأ ... موقف جديد عليا .. بس في المواقف اللي زى دى بروح للكردي.

خدنا العربيه وطلعنا على الشاليه وشغلنا أغنيه على عش الحب وطير ياحمام.

لحد مافوجئنا قدامنا بحواجز زى مايكون كمين معمول وأربع عربيات على جوانب الطريق , وتلت أشخاص واقفين في نص الطريق قدام الحواجز ,بيشاورا لعربيتنا تهدى.

هدى وسيم بالعربيه وقالهم بأبتسامه:

خير فيه حاجه !!؟ ... باين عليكم مش بوليس

بصلى الكردى بأشتهاء قدام وسيم واللي بان أنه أتضايق من بصات الكردي.

فقاله:

وسع الطريق يابتاع أنت بدل ما اكلم البوليس.

وطلع موبایله فلقی الکردی بیضریه بالبوکس وبیتفح باب العربیه و وبیزقه ونزله من العربیه بالعافیه.

حاول وسيم يضرب الكردى بالبوكس, بس الكردى تفاداها وأداله بوكس تانى فى سنانه فوقع وسيم على الارض.

فطلع الكردى مسدسه وشد أجزائه وقاله:

أحنا عايزين الحلوه في طالعه , أخلع أنت.

هعد لحد تلاته لو لقيتك لسه قدامي هفرغه في جتتك.

فقاله وسيم بتحدى:

فرغه في جتتي , بس مش همشي وأسيبها..

نزلت من العربيه علشان أبص على وسيم اللى على الارض بس عنده أستعداد يموت وهو راجل!!!

الكردى حط المسدس في جيبه ومد ايده علشان يقوم آدم وقاله:

رجوله ياباشا , معلش ياست البنات , طلع مش خاين مش هينفع أقتله.

مردتش على الكردي, وحضنت وسيم اللي وقف مستغرب من اللي بيحصل وقالي:

أنتي تعرفيهم !!؟؟

قولته:

أها أعرفهم

و وشوشته في ودنه وقولته:

وأعرف كمان أنك بتحب الرجاله!!

بصلى بصه معرفتش معناها بس خد نفسه وركب عربيته ورجع القاهره وسابني.

بعدها أطلقنا علشان مكناش ننفع لبعض برده, أنا مجنونه زى ما بيقول..., وهو ... , بس أتفقنا كل واحد يحفظ سر التاني.

هقولك على أهم صفحه وأهم راجل في حياتي " آسر"

نسيت صح أقولك, قبل ما أحكيلك قصتي مع آسر.

هحكيلك ليه بيقولوا عليا مجنونه!!

السر الخامس ولا انت نسيته؟!! .... باين عليك بتنسى زيي.

وأنا عندى 11 سنه وبعد ما أمى ماتت كانت بتجيلى نوبات صرع , وكنت بشتم كل اللى حواليا وأضريهم ,علشان بسمع أفكارهم وهما بيكدبوا على بعض , كنت عنيفه وبكسر أى حاجه قدامى لدرجه أنهم حبسونى فى أوضتى , بابا سفرنى بره وعرضنى على دكاتره نفسيين كتير بس كلهم قالوا أنى كويسه ومفييش حاجه وأن اللى بيحصلى ده ممكن يكون نتيجة صدمه نفسيه حصلتى بسبب وفاة أمى!!

بس كان الوضع بيسوء ومكانش فيه علاج لحالتي الا المهدئات, واللي كانت بتجيب نتيجه عكسيه معايا وتعصبني أكتر, فبطلوا يدوهالي, ناس قالت لبابا أني ممكن أكون ملبوسه!!!

بابا مبيصدقش في الخرافات دى بس من يأسه أضطر يجيب سحره يمكن يعالجوني.

كان كل مايجيب ساحر يقوله أنه عليا جن صعب وانه علشان يطلع محتاجين فلوس كتير, طبعا كلهم كدابين وكنت بسمع أفكارهم وأقرأى حركاتهم.

كانوا بيقولوا لنفسهم, ده أب غنى ومفيهاش حاجه لو قلبناه فى كام قرش وفى الاخر هنقوله, والله الجن كان قوى ومعرفناش نطلعه!!

عرف بابا أن كلهم نصابين, وبطل يجيب الدجالين دول تانى, لحد ماواحد صاحب بابا فى الشغل قاله على شيخ مبياخدش فلوس فى الخير, بابا كان رافض موضوع السحره ده تانى بسلما سمع كلام صاحبه، واللى قاله أن ده يعتبر شيخ مش ساحر وأنه شاطر وكمان مشهيستغله وياخد فلوس وافق وجابوا الشيخ.

دخل عليا شاب مش كبير في السن زى باقي السحره كانوا بيجوا، في أيده سبحه طويله, مكنتش عارفه اقرأ أفكاره ولا لغة جسمه, بس في عينه حزن غريب شدني!!

بص عليا كنت ساعتها بشتم سعاد الخدامه علشان كانت بتخون جوزها مع صاحب محل البقاله اللي على أول شارعهم.

أتفرج عليا وانا بشتمها ,وبعد كده سأل على مكان الحمام علشان يتوضى , أتوضى ووقف فى نص الاوضه وقال كلام غريب ونهى كلامه بكلمة أشتاتا أكتر من مره.

فسمعنا صوت خبط كأن حد بيخبط على الدولاب, وبعدين هبت رياح مع أننا قافلين الشبابيك.

شويه ولقيت أبو سبحه طويله بيكلم الهوا كان تقريبا بيقول:

أيه رايك يا...نصر باين!!!

قولتله:

نصر مين ؟!!محدش واقف في الاوضه غيرك أنت وبابا وسعاد الخدامه, أنت بتكلم الهوا ... أنت مجنون ؟!

مد أيده وحطها على راسي فكنت هعضه , شال أيده بسرعه وقال لبابا:

بنتكم زى الفل مافيهاش حاجه ولا عليها جن , وبالنسبه لنوبات الصرع اللى بيتجيلها دى مكن تكون بسبب وفاة وال.....

قطع كلامه لما سمعنى وانا بقوله:

بص في عيني تاني فبصتله في عينه وبحلقت فيها, قال في باله وسمعته:

ضلمه .. ضلمه كبيره وهتبلع كل اللي حواليها.

```
قالى بصوت مسموع:
```

تقصدى أيه بغراب !!!؟

قولتله:

أنت مربي غراب.

قالى:

وعرفتي منين ؟

قولتله:

شمیت ریحته ... شکله بیحبك أوى ... بیتمرمغ فیك.

قالى:

ياااه ده أنتى حاسة الشم عندك قويه أوى!!!

قولتله:

مش أنا اللي شميتك

وشاورتله على قطى باستيت اللي قاعد في ركن الاوضه

ضحك أبو سبحه طويله وقال لبابا:

ماشاء الله عليها بنتك ذكيه جدا ...عرفت أنى عندى غراب علشان شافت على هدومى ريشه سودا , ونفض كتفه فنزلت ريشه صغيره سودا على الأرض.

زى ماقولتك بنت كويسه, وبالنسبه لنوبات الصرع اللى بتجيلها, أكلوها بصل فى كل يوم وشريوها مية الحمص بعد ماتحلوها بالعسل, وخلوها تسف القرنقل بالعسل برده, وهكتبلك شوية حاجات طبيعيه تجيبها من العطار وتبقى تديهالها, وياريت تجبيلوها حيوان يكون دمه بارد زى السلحفاه او حوض سمك بدل القطط والكلاب علشان بيبقوا مهيبرين شويه.

وأستأذن من بابا ومشى ومارضاش ياخد فلوس وقاله:

مباخدش فلوس في الخير.

بس قبل مايمشى شوفته وهو بيقول لبابا حاجه فى ودنه, خلت بابا ينفعل عليه ويطرده بره, وحتى العلاج اللى قال عليه الشيخ ده, بابا رفض يدهولى.

كان نفسى اعرف قال أيه لبابا خلاه ينفعل عليه كده!!!, حتى حاولت أقرى أفكار بابا ومعرفتش برده!!!

بعدها خفیت لوحدی ورجعت طبیعیه من غیر حاجه , کانت بتجیلی نوبات الصرع برده بس علی فترات بعیده.

عرفت ليه بيقولوا عليا مجنونه.... تعالى بقى أحكيلك أهم قصه فى حياتى قصتى مع " أسر"

# الفصل الرابع

# "مقدرش محبكش"



قصتي مع أسر

قصتى مع آسر بدأت بالصدفه, لما نزلت برنامج مع النت وطلع متفيرس.

اللاب توب بتاعى واللى عليه كل شغلى أتهكر وحد أخترق كل البيانات بتاعتى وشفرها كلمت بابا في التليفون وقولتله:

بابا محتاجه مهندس كومبيوتر يجيلي بسرعه.

قال في التليفون:

یااه ده أنتی منشنه بقی!!!

```
قولتله:
```

مش فاهمه

قال:

فيه قدامى دلوقتى فى المكتب مهندس كومبيوتر ومش أى مهندس ده أشطر مهندس عندى فى الشركه, هبعتهولك حالا.

معداش ساعه ولقيت جرس الفيلا بيرن , أنيتا فتحتله.

فشاورتله بأيدى وأنا في الرسيبشن يدخل بسرعه.

قالى:

خير يافندم ؟

قولتله:

نزلت برنامج من على النت, أول ماسطبته الجهاز أتفيرس, و وقف خالص.

فتح الجهاز وفي أقل من دقيقه كان كل حاجه في الجهاز رجعت طبيعيه!!!!

قالى:

أبقى خدى بال حضرتك وأنتى بتنزلى برامج من النت ... وانا نزلتلك متصفح بأنتى فيرس, هيعملك علامه على المواقع اللى فيها فيروسات والمواقع النضيفه.

بعد أذنك.

أداني ضهره وكان رايح ناحية الباب.

قولتله:

أنت قليل الذوق!!

لف ضهر تاني وقالي بأستغراب:

ليه يافندم كده .. حضرتك بتشتميني ليه !!؟

قولتله:

علشان مسألتنيش لو عايزه حاجه تانى ولا لأ, وخدت نفسك وكنت هتمشى من غير ما أاذنلك.

هنا تعابير وشه أتغيرت وأتحولت من الاندهاش للغضب

وقال:

أولا أنا مش شغال عند حضرتك علشان أخد أذن منك ,ثانيا أنا أول ماجيت سألتك على العطل وهحضرتك قولتلى الاب توب بس.

حبیت أستفزه أكتر معرفش لیه !!! فیه ناس كده بنحب نخنق علیهم ونشوفهم وهما متنرفزین , وبنلاقی متعه فی حاجه زی كده.

```
قولتله:
```

أنت شغال عند بابا يعني شغال عندي , اللي بابا بيملكه أنا بملكه.

قالى وهو بيزعق المره دى:

أنا مش ملك حد .. فاهمه ... أنا شغال مع باباكي ... مش عنده زى ماباخد منه فلوس زى مابياخد منى شغل ... ومكن تعتبريها شراكه .. وانا جيت هنا تفضلا وكرم منى ...وبعد أذن حضرتك علشان عندى شغل.

وأدانى ضهره تانى وهكان هيمشى بس وقف من غير مايلف لما سمعنى بضحك بصوت عالى وبقوله:

أنت برده قليل الذوق , مسألتنيش لو محتاجه حاجه تاني.

لفلى وقال بنفاذ صبر وأبتسامه مصطنعه:

حضرتك عايزه حاجه تاني ؟!

قولتله:

أها عايزه رقم تليفونك...

فقد القدره على النطق!!!

فكملت عليه وقولتله:

انا شايفه أن مفيش في أيدك دبله يعنى لا خاطب ولا متجوز, فكنت عايزه رقم تليفونك علشان أتعرف عليك ولو لقيتك مناسب هتجوزك.

سمعت أفكاره وهو بيقول:

ياديني على اللي بيحصل, بنت ياسين عوده طلعت مجنونه!!!

وقال بصوت مسموع:

أنا مش خاطب فعلا ولامتجوز, بس أسف مش هديكي تليفوني.

قولتله:

ده أمر مش طلب..

قالى بنفاذ صبر تانى:

ياهانم أنا مش فستان علشان تجربيه وتشوفيه على مقاسك ولا لأ, مش يمكن انتى اللى متعجبنيش.

قلتله:

خلاص نجرب ونشوف رهات رقم تليفونك

قالى:

مش هدیکی رقم تلیفونی ..... لانی معییش تلیفون أصلا ... کل التلیفونات دلوقتی سهل حد یخترقها .... بصی مش هنکر أنك لفتی أنتباهی ونادرا لما واحده بتلفت أنتباهی ... لو عایزانا نتعرف كأصحاب ده یبقی شرف لیا.

وطلع قلم من جيب الجاكيت بتاعه ودور على حاجه يكتب عليها مالقاش حواليه.

فمدیتله أیدی وفتحت كفی علشان یكتب علیها, أول مالمس أیدی حسیت بحاجه بتشدنی لیه أكتر, وبحلقت فی وشه أكتر وهو بیكتب علی كف أیدی.

وشه مقبول, حالق ذقنه وشعره ناعم وأنا بحب الشعر الناعم, وملامحه كانت رجوليه, عين واسعه وحواجب كثيفه وحسنه صغنونه على أنفه, شكله مدى على ممثل أسمه هانى سلامه لا.... لأ شكله مدى على مغنى أسموه خالد سليم ... مش عارفه الصراحه ممكن ميكس مابين الاتنين.

بصيت على اللي كاتبه في أيدي, لقيته كاتب

حواوشي شلبي في وسط البلد الساعه 6

رفعت عيني وبصيت عليه لقيه مشى وساب الفيلا!!!

وصلت عند محل الحواوشي الساعه 6 ونص ودورت عليه وسط الناس لحد مالقيته بيشاورلي , كان قاعد على ترابيزه بلاستيك من اللي مرمين قدام المحل.

الجو زحمه قوى .. وكل اللى حوالينا بياكلوا حواوشى بطريقه غير آدميه, بوقهم كله سمنه وزيت من الاكل.

ويععع

بيمسحوا بقوهم المزيت بأيديهم فبيزيتوا أيديهم برده .... بصيت عليه لقيته بيعمل زيهم وبيقولى:

کلی!!!

قولتله:

ممكن شوكه وسكينه!!

ضحك وقالى:

لا ظفرى أيدك ... هو بيحب كده ... الحواوشي بيتقطم كدهوه.

وفتح بوقه على آخره وكل تقريبا نص الرغيف في قطمه واحد , ومسح بوقه المزيت بالمنديل ... الحمد لله أنه أستخدم منديل مش أيده!!

قولتله:

أنا مش جعانه أنا هستناك عند الترابيزه دى.

وشاروتله على ترابيزه تبع قهوه جمب محل الحواوشي, في ركن هادي.

وقولت:

خلص أكل وابقى تعالا.

قام من مكانه ومسح أيده بالمانديل وقالى:

لا أنا هاجي معاكي أنا شبعت أصلا.

حك أنفه!!!

قعدنا على القهوه

وطلب معسل قص وطلبلي شيشه تفاح و عصير مانجا.

أتكلمنا كتير وعرفت أنه مش بس مهندس كومبيوتر, كمان بيحضر دكتوراه في علم النفس السلوكي, والمصادفه أني قريت عن علم النفس بتعمق علشان كنت عايزه أعرف ليه الناس بتخون!!

فلقينا حاجات مشتركه نتكلم فيها, زى جون واطسن مؤسس علم النفس السلوكي والسلوكيه الراديكاليه, والمنهجيه والنفسيه وكلام كتير حسينا فيه أن دماغنا قريبه من بعض!!!

كان وحيد أبوه وأمه و اللى ماتوا في عبارة السلام وهما راجعين من الحج, كانت صدمة عمره, ماعتها كان عنده 17 سنه ولقى نفسه لوحده في الدنيا مالوش حتى اى قرايب يطمنوا عليه.

أستثمر في ورث أبوه وعمل شركه صغيره لاستيراد قطع غيار أجهزة الكومبيوتر, وقدر يصرف على تعليمه ويطور نفسه بنفسه, لحد ما جاله عرض مغرى في شركة بابا فصفى شركته وأشتغل مع بابا.

خدنا على بعض بسرعه وأتعودت عليه وبقايا نتقابل كل يوم الساعه 6بعد مايخلص شغله.

لحد ماجه في يوم وقالي:

أيه رأيك نتجوز!!

قولتله:

خدتها من على لساني!!!

وأتجوزنا

يوم الصباحيه مجبليش الفطار على السرير زى كل مالرجاله بيعملوا أول يومين في الجواز!!! وصحيت على صوته وهو بينهج كأن بيجرى, بصيت عليه لقيته بيعمل رياضه و بينطط.

قولتله بصوت ممحون:

صباح الخير ياحبيبي.

قال بصوت مدرب كرة قدم:

كل ده نوم أصحى يله قومى فوكى جسمك كده بكام تمرينه.

أنا فطرت هتلاقى باقى فطارى بره أفطرى أنتى كمان, ويله علشان هنجرى فى ملعب التنس بتاع الفندق!!!

كان نشيط جدا , ومبيريحش..

دايما بيستغل وقته أما يقرأه أو يجرى أو يجبرني ألعب معاه شطرنج!!!

بس كانت هوايته المفضله, ضرب النار, كان ليه يوم فى الاسبوع ييتدرب فيه على ضرب النار والنشان فى النادى, مش بس كده كمان رخص سلاح.

مكنتش ملاحقه عليه فرهدني لدرجه أني بقيت بسيبه أوقات يروح لوحده النادي.

بس أيه بقى كان حمش أوى ودمه حامى كده وبيغير عليا أوى فوق ماتتخيل.

لدرجة في مره واحنا في مطعم أتخانق مع الجارسون علشان سألني تطلبي أيه ياهانم!!!

لو حد بصلى بس بعينه كان بيعمل خناقه كان ممكن توصل أنه يضرب اللي قدامه.

كان حب تملك بس كان حب!! مكانش بيخوني ودي أهم حاجه عندي..

أفكاره لما كنت بقراها كنت بلاقيها صادقه الى حد كبير للى بيقوله.

ساعات بيكدب بس كدب مابيضرش , وانا عارفه طبعا أن محدش صادق ميه في الميه..

كل حاجه فى آسر كانت مظبوطه , شاب طويل ووسيم , مثقف , دماغنا قريبه من بعض فى حاجات كتيره , بيحبنى وبيغير عليا , مبيكلمش ستات غيرى.

كل حاجه مضبوطه بس لسه فاضل أهم أختبار , أختبار الكردى.

هتقولي ليه !!؟ ماهو مش بيخونك ؟!! هقولك معلش الفضول شدني أعرف هيعمل أيه!!!

جه يوم الاختبار الحقيقي لآسر طلعنا بالعربيه على طريق أسكندريه الصحراوي.

شغلت أغنيه على عش الحب وطير ياحمام, وريحت راسي على كتفه.

باين قدامنا على الطريق 4 عربيات دفع رباعي واقفين على جوانب الطريق, وحواجز

محطوطه في وسط الطريق زى كمين الشرطه, وظهر الكردى ووراه أتنين تانين قدام الحواجز

وشاورلنا علشان نهدى العربيه.

هدى آسر العربيه وفتح أزاز العربيه

وقالهم بأبتسامه:

خير ياشباب!!

بصلى كردى بأشتهاء وقاله:

خير أن شاء الله , أحنا عايزين الحلوه دى تنزل من العربيه , وتخلع أنت بعربيتك.

أتمطع أسر وريح ضهره لورا وهو بيقوله:

```
ولو منزلتهاش من العربيه ؟!!
```

طلع الكردى مسدسه وشد أجزائه وحطه على راس آسر

وقاله:

هتموت ......وهننزلها أحنا بمعرفتنا ,.....هعد لحد تلاته لو منزلتهاش هفجر رأسك بالمسدس.

هنا خاف آسر و أترعب لما لقى المسدس على راسه.

وقالي:

أنزلى من العربيه!!!!

بصتله بأستغراب وقولته:

بتقول أي....

قطع كلامه وأتعصب عليا وقالى:

بقولك أنزلى ... هيموتوني!!!

ومد أيده ومسك المقبض بتاع باب عربيتي , وفتح المقبض.

أتصدمت وبصيت للكردى وللأتنين اللى معاه واللى كانوا باصلى ومستنيين أشارتى بس فوجأت زيهم باللى حصل!!!

أسر وهو بيمد أيده علشان يفتح مقبض الباب اللي جمبي,

بحركه خفيفه أيده رجعت وفيها مسدس طلعه من جمبه وهو بيتمطع في الاول خالص.

وضرب 3 طلقات بسرعه جدا, وبدقه صابت الكردى والاتنين التانيين قبل حتى مايندهشوا, وداس بنزبن و وقع الحواجز بالعربيه, وطار بالعربيه بعيد عنهم.

كنت مندهشه من اللي بيحصل, أيه ده!!!!

أيه اللي عمله ده!!!!

خلانا كلنا نفتكر انه خايف بس هو كان بيحضر للهجوم عليهم!!!

أزعل دلوقتي على الكردي اللي ممكن يكون مات ولا أفرح بالسبع اللي جمبي!!

حضنته وبوسته وهو سايق وقولتله:

ايه ياقلبي ده... أيه الدماغ دي!!

وقعدت أبوسه من رأسه وخدوده.

ودورت بسرعه في الاسطوانات بتاعة الموسيقي على أغنيه معينه لحد مالقتها

حطيت الاسطوانه فطلع صوت موسيقي وصوت شاديه بتقول:

و حياه عينيك و فداها عينيه .. انا بحبك قد عينيا

لا قد روحی .. لا لا شویه .. طب قد عمری .. بردو شویه

ريحت راسي تاني على كتفه وحضنته جامد وانا بغمض

عيني وبسمع شاديه وهي بتقول:

في ايديك قوه تهد جبال .. في ايديك قوه

و عليك صبر وطولة بال .. و عينيك حلوه

وصلنا الشااليه وكان الوحيد في اللي اتجوزتهم اللي وصل بيا الشاليه!!

أول ماوصلت الشاليه , أستنيته يخش الحمام , وجريت كلمت الكردى علشان أطمن عليه.

مردش في أول مره, بس رد تاني مره, والحمد لله طلع سليم والرصاصه جرحته سطحي بس, وقالى أن فيه واحد منهم مات وواحد تاني اتصاب وحالته حرجه.

الكردى كان متعصب أوى ف التليفون حاولت أهديه معرفتش خالص ,فقفلت بعد ما أتفقت معاه نتقابل ونتكلم لما أرجع القاهره.

قضیت أحلی أسبوع مع آسر وبقیت زی مابیقولوا خدامه تحت رجله , مش مشكله, أهم حاجه انی لقیت راجل مخلص بیحبی وعنده أستعداد یدافع عنی ویموت علشانی. رجعنا القاهره وأنتهزت فرصة انه فی النادی وهیقعد طول النهار , وكلمت كردی واللی جه الفیلا وكان متعصب جدا.

وقالى:

أزاى يعنى ماتقوليليش أنه معاه سلاح!!!

```
قولتله:
```

والله ماأعرف .... أنا أتفاجأت زيك بالضبط , طمني على رجالتك.

قالى:

زى ماقولتلك بهتوم مات والاسواني الحمد لله نجدوه وحالته بتتحسن.

قولتله:

الحمد لله, وبالنسبه لبتهوم أنا متكفله بكل اللى يطلبوه أهله, وحضرت هديه للاسوانى هتعجبه جدا لما يقوم بالسلامه.

قالى بفضول وهو مكشر:

هدية أيه !!!؟

قولتله:

وصیت وسیم طلیقی یعمله سنجه دهب.

فقالي وهو مكشر برده:

وبالنسبه ليا, ما انا أتصابت برده بس ربنا نجدني بأعجوبه.

فقولتله وانا مبتسمه:

متخافش مش نسیاك , وصیت وسیم یعملك خنجر صغیر على أد الخربوش اللى خدته .. بس أیه رایك فی جوزی المره دی ... طلع دكر وعلم علیكم.

وقعدت أضحك فأتضايق وكان هيمشى وراح خلاص ناحية الباب, بس أعترضت طريقه ووقفت قدامه وأنا حاطه أيدى على بوقى وبحاول أمسك نفسى من الضحك.

وقولتله:

خلاص والله بهزر معاك ..... أنا أول ما آسر ضربك بالنار كنت خايفه عليك أوى وأول مالقيت فرصه كلمتك.

لقيته مردش عليا وفضل متنح وبيبص ورايا!!!

لفيت وببص ورايا لقيت آسر واقف عند باب الفيلا, في أيده مفاتيح الباب والايد التانيه مسدس موجهه ناحيتي وناحية الكردي!!!

# الفصل الخامس

#### "وعد"



لفيت وببص ورايا لقيت آسر واقف عند باب الفيلا, في أيده مفاتيح الباب والايد التانيه مسدس موجهه ناحيتي وناحية الكردي!!!

أتصدمت وقولته:

آسر أنت فهمت أيه ؟!!! ده ....ده

قطع كلامي وقال:

ده أيه ياخاينه؟!! .... جايبه عشيقك هنا بعد مأتفقتى معاه يقتلتنى وفشل ... الحكايه واضحه زي الشمس!!!

شد أجزاء مسدسه

وقف الكردى قدامى وأدانى ضهره علشان يبقى بينى وبين آسر بيحيمينى لو آسر ضرب بالرصاص.

قالى الكردى وهو بيبص على المسدس اللي متوجه ناحيته:

فهمی جوزك ياهانم ده مفكر أننا بنخونه!!!

ولف رقبته وبصلى وكمل كلامه وقال:

الحكايه كده شكلها هتقلب على العشق الممنو....

قطع كلامه وفاجأ آسر!!

ضرب برجله أيد آسر اللى ماسكه المسدس... المسدس الى فى أيد آسر وقع على الارض وأتنطر بعيد.

هجم آسر وحاول يضرب الكردى بأيده ...بس الكردى تفادى بوكس آسر،

ومسك دراع آسر ولواه ورا ضهره.

الكردى دلوقتى مسيطر على الوضع لاوى دراع آسر ورا ضهره بأيد, ومطوق أيده التانيه حوالين رقبة آسر ومثبته, فضل الكردى مثبته ووقالى:

فهمى جوزك ياهانم اللي حصل!!!

لسه هقول لآسر اللي حصل , لقيت آسر مط جسمه لورا وضرب براسه أنف الكردى!!

الكردى فك أيده من حوالين رقبة آسر ورجع لورا ومسك أنفه , فلقاها بتجيب دم

أنفعل الكردى وأتعصب جامد, ولقى آسر بيهجم عليه وعايز ينتهز الفرصه ويضريه بالبوكس

, بس الكردى تفاداها برده, وأدى لآسر بوكس جامد في وشه , ورفصه في بطنه برجله.

فأتنطر آسر ووقع على الارض...

حاول آسر يزحف علشان يوصل للمسدىس اللى على الارض بس الكردى سبقه وشاط المسدس برجله بعيد خالص.

الكردى بصلى وقالى:

ماتفهميه ياهانم !!! قسما بالله مش عايز أضريه علشان..

الكردى أتفاجأ بآسر اللى قام من على الارض و هجم عليه برده و ضريه المره دى بفازه نزلت على راس الكردى واتكسرت!!

الكردى ماأتأثرش بالفازه اللي ضربه بيها آسر مع أنها جرحت راسه!!!

وهنا أتعصب الكردى اكتر من آسر اللي مش عايز يسمع

وضريه بوكسين ورا بعض!!

وقع آسر للمره التالته على الارض, بس المره دى الكردى ركب فوق آسر وثبت دراعته وهو على الارض وقاله:

الهانم كانت عملالك أختبار رجوله ... كانت عايزه تشوفك هتنزلها من العربيه و لاهتدافع عنها ،فهمت ياغشيم!؟

هدى آسر شويه وقعد يستوعب اللي قاله الكردي

ربس الكردى أداله بوكسين تانين جامدين في وشه!!!

وقاله:

دول علشان بهتيم اللي قتلته يا غشيم!!!

وقام من فوق آسر وجه ووقف جمبي

آسر قام من على الارض ووهو بيكح دم و مشى بيتمطوح ناحية الباب من كتر الضرب اللى خده من الكردى.

وصل عند باب الفيلا وقالى قبل مايخرج:

أنت مجنونه وأستحاله أعيش معاكى تحت سقف واحدر

ورزع الباب ومشى....

أنهرت في العياط وزعقت في الكردي وطردته بره الفيلا.

أنا غبيه .... ضيعت من أيدى أكتر حد حبيته وحبني...

ضيعت من أيدى البني آدم الوحيد اللي مخنيش

بالعكس أنا اللي خونته !!!.....أنا اللي أستاهل الدفن حيه المره دي .... بس لأ عمري

ماهسيب آسر يضيع مني ... هعمل المستحيل علشان يسامحني.....

أستنيت أسبوع على ما الوضع هدى, الغريبه انه آسر ماطلقنيش ولا بعتلى ورقة طلاق, معنى ذلك انه لسه بيحبني وممكن بسامحني.

آسر معهوش تليفون ولا حتى فيس بوك ولا أنستغرام, عنده بس حساب تويتر بيتواصل من عليه بكل الناس!!

كنت ببعتله عليه رسايل أستعطفه فيها علشان يسامحنى ويرجع ليا بس مكنش بيرد,وعملى بلوك كمان!!!

فروحتله شقته اللي في مدينة نصر , مرضيش يفتحلي حتى الباب وطردني...

نزلت من العماره

وقعدت في عربيتي وفضلت مستنياه ينزل من الشقه , أكيد هينزل يروح الشغل.

فضلت مستياه طول الليل كنت بنام على نفسى في العربيه لحد الصبح ماطلع عليا.

شوفته وهو بینزل من العماره ورایح ناحیة عربیته, نزلت من عربیتی وجریت علیه ومسکت فی هدومه وأنا بترجاه یسامحنی وبقوله أنی هعیش خدامه تحت رجله لو غفر لی غلطتی دی مکنش بیرد علیا, کان جامد وبارد زی التلج تجاهلنی تماما, وزقنی ورکب عربیته وطلع بیها بسرعه!!

تقله علیا وجموده ده جنننی أکتر .... زی مابیجنن أی واحده حبیبها بیتقل علیا ومش معبرها

طلعت وراه بعربيتى بس مالحقتوش, روحتله الشغل, في الشركه بتاعة بابا, وسألت عليه قالولى انه قدم أستقاله من أسبوع وساب الشغل مع بابا!!! حتى ما أهتمتش اعرف أذا كان بابا عرف اللي حصل ولا لأ.

المهم عندى آسر يرجع ليا تاني.

رجعت أستنيته قدام العماره اللى فيها شقته .....بس مارجعش خالص!!! فضلت مستنيه في عربيتي .. مستنيه في الشارع , بس برده مارجعش بيته خالص!!!

روحت سألت البواب, واللى فاجأنى وقالى أنه كلمه فى التليفون وعارض الشقه للبيع!!! أتجننت اكتر .... كده ضاع منى آسر!!!

روحت الفيلا منهاره .... عينى بقت حمرا من كتر العياط , وحسيت أنى حياتى كلها مالهاش لازمه....

جاتلي فكره وقرار في نفس الوقت.

عملت أكونت جديد على تويتر غير اللى عملى عليه بلوك وبعتله فيديو في رساله ... فيديو هيحدد أذا كان فيه أمل يرجعلى آسر تاني ولا لأ...

فيديو ليا وأنا بنتحر بالسكينه ... وقولت فيه جمله واحده بس

مأقدرش أعيش من غيرك سامحني...

أنا غير أى بنت بتهدد بالانتحار لما حبيبها يسبيبها.. أنا كارمن

هقولك معلومات عن الانتحار على ما آسر يجي ينقذني ده لو جه ينقذني.

اللى بيقطع شرايينه علشان ينتحر مش بيموت علشان شرايينه أتقطعت ومش هيعرفوا يخيطوها تانى!!!

بيموت علشان دمه بيتصفى, ممكن دمه يقعد يتصفى ساعه من غير مايموت, على حسب الجرح اللى فى أيده وعلى حسب هو جارح شريانه بالطول ولا بالعرض

مش مصدقنی !!!؟ طیب مسألتش نفسك لیه اللی بیضطروا یقطعوا أیدیهم بیعیشوا عادی

علشان زى ماقولتلك الموت بيكون نتيجة أنخفاض ضغط الدم الناتج عن النزيف, واللى بيسبب عدم أنضباط في دقات القلب ويعدها سكته قلبيه.....

أهوه آسر جه أهوه وملهوف عليا وبيشلني من على الأرض وبيحطني على السرير, بيجرى يجيب شاش وقطن ومطهر وبيوقف النزيف وبيلف دراعي بالقطن والشاش.

وبيقولى ماتموتيش دلوقتى.

جسمی کان هبط من الدم اللی نزفته , آسر جری وجاب عصیر رمان من التلاجه , وسندنی وشرینی بأیده

بصتله وأنا عيني كلها دموع وأترجيته مايسبنيش.

قولتله:

أنا أسفه والله بعشقك ومكنش قصد....

قطع كلامي وقالى:

أشربي وأرتاحي وبعدين نتكلم

قولتله بصوت خرج ضعيف:

لا مش هرتاح الا لما تسامحني ونرجع لبعض تاني.

وشه أتقلب وقالى بعصبيه:

وأنا مش هسامحك الالما تحكيلي على كل حاجه مخبياها عني.

جسمى بدأ يفوق شويه بعد ماشريت العصير وقولتله:

هقولك على كل حاجه ... بس توعدني تسامحني ؟!

قالى:

لوكنت صريحه معايا وقولتيلي على كل اللي مخبياه عليا هسامحك وده وعد

قلتله:

مهما كان اللي عملته!!؟

قالى:

مهما كان اللي عملتيه..

حكيتله على كل حاجه على آدم ووسيم وأزواجى اللى قتلتهم فى رحلتى وأنا ببحث عن الاخلاص

كل ماأحكيله على حاجه عملتها .... يتصدم أكتر

خلصت كلامي كله وسكتت

وهو كمان فضل ساكت مش مصدق اللي بيسمعه ومش عارف ياخد رد فعل.

قولتله:

أرجوك يأآسر سامحني, أنت وعدتني لو قولت كل حاجه بصراحه هتسامح.... قطع كلامي وقال: سامحتك!!! بصتله بأندهاش ومكنتش مصدقه نفسى قولتله: أيه !!؟ قالى بهدوء: خلاص سامحتك , وممكن نرجع لبعض عادى!! حضنته وفضلت أبوس فيه, وقولته: من النهارده انا خدامه تحت رجلك والله ماهكدب عليك وعمرى ماهخبي عليك حاجه تاني أبدا قالى بحنيه: وعد!!؟ قولتله بثقه: وعد.

بصيت على هدومه اللي كلها بقعت من دمي وقولته:

قوم غير هدومك يابيي و خد شاور عايزاك جمبي وحشني أوى حضنك.

بص على هدومه لقاها كلها دم.

راح ناحية الدولاب وقالي وهو مبتسم:

أوعى تكوني رميتي البجامة الزرقا بتاعتي!

فرحت أوى أنه رجع طبيعي بسرعه كده , بصراحه كنت مبهوره بحبه ليا.

الحب اللي خلاه يسامحني على كل اللي عملته في أقل من 5 دقايق!!!

قولتله بحنيه:

البجامة دى كنت على طول باخدها في حضني وانت بعيد عني.

بعتلى بوسه في الهوا وهوه بيغير هدومه اللي عليها دمى وبيرميها جمبى على السرير

قومت أنا كمان وغيرت هدومي ولبست حاجه بيحبها , وقعدت قدام المرايا أحط ميك أب.

سمعت موبایلی رن , دورت علی موبایلی , لقیته تحت المخده علی السریر , بصیت علی الرقم لقیته

, 011شركه الموبايل..

وخد البيجامه ودخل بأخد شاور...

رميت الموبايل تانى وهو بيرن على السرير , بس سمعت زى صوت ذبذبه وانا برميه , مسكت الموبايل لقيت صوت الذبذبه راحت!!!

فضلت ماشيه بالموبايل على السرير علشان أعرف صوت الذبذبه دا جاي منين!!

لقيته جاى من ناحية هدوم آسر اللي على السرير!!!

مشيت بالموبايل على الجاكيت بتاعه , فلقيت صوت ذبذبه الموبايل بتزيد , عند حته معينه في الجاكيت!!!

سيبت الموبايل ومسكت الجاكيت, لقيت حاجه زى زرار جوه البطانه, فتحت البطانه بتاعة الجاكيت فلقيت ميكرفون صغير متركب فيه كارت ميمورى ميكرو!!!!

آسر بيسجل كلامي!!!!!!!!

دورت زى المجنونه على أى حاجه في جيوبه, لقيت تليفون!!!

آسر معاه تليفون !!! وكان مخبى عليا!!!

حاولت أفتح الموبايل لقيته بباسورد, بس لقيت رساله واتس باينه على شاشة الموبايل كانت مبعوته, ولسه مافتحاش...

مكتوب فيها

عملت أيه !!؟

فهمت تقريبا نص الحكايه لما شوفت أسم اللي بعتاله الرساله "هايدى"

خرج آسر من الحمام بالفوطه ملهوف لما أفتكر انه نسى وقلع هدومه اللى فيها الميكرفون والتليفون

أتصدم لما لقاني ,مقطعه بطانه الجاكيت وماسكه تليفونه.

غلط غلطه واحده بس, عرفت منها خيانته ليا طول الفتره

دی.

صرخت فيه ووقولتله:

أنت مين !!!؟ وتعرف هايدى أخت آدم جوزى منين!!!

هجم عليا وخطف الموبايل من أيدى, وفضل يضرب فيا بأيده وبرجله علشان ياخد

التسجيل الصغير اللي في أيدي

لحد ماقدر يفتح أيدى بالعافيه وياخد التسجيل, شدنى من شعرى وجرجرنى منه على الارض وهو بيضرب فيا

وبيقولى:

أنتى مجنونه ... أنتى اللي قتلتى أعز صديق ليا آدم ... ياواطيه

الموت رحمه ليكي يا وس .... أنا هخليهم يعدموكي بعد ما تتفضحي يابنت الكلب!!!

وساب شعرى وفضل يشوط فيا برجله...

حاولت أقاومه فرفسته برجلى فى حته حساسه , فسابنى ومسكها بايده بعد ماصرخ من الالم جريت على السرير , وفتحت الواتس بسرعه وبعت رساله صوتيه للكردى صرخت وقولتله: ألحقنى ياكرد...

خطف آسر الموبایل ورماه بعید ومسك راسی وخبطها فی حرف السریر مرتین وسابنی وأنا سایحه فی دمی و بیغمی علیا, عینی كان بتفتح وبتقفل لوحدها وبغیب عن الوعی شویه وبرجع تانی....

شوفته وهو بيلبس هدومه وبياخد الموبايل وبيحط التسجيل الصغير في جيبه.....

شوفته وهو بيتف عليا قبل مايديني ضهره ويروح ناحية باب الاوضه وهو بيمشي.....

شوفت حد بيضرب راس آسر بعصايا خشب أول مافتح باب الاوضه علشان يخرج.....

ماشوفتش مین اللی ضریه, بس شوفت آسر وهو علی الارض مغمی علیه وراسه بتجیب دم کته .

بعدها غيبت عن الوعي

# الفصل السادس

# " أنتقام كارمن"



فوقت من الغيبوبه لقيت نفسى فوق السرير, حسست على راسى مكان ماخبطنى آسر, لقيتها مربوطه بشاش!!!

لفيت بعيني في الاوضه مالقتش أسر على الارض بس لقيته متكتف ومربوط في كرسي قدامي.

بوقه متكمم علشان مايطلعش صوت!

كان فايق وبيحاول يفك نفسه , بس كان مربوط جامد , ومتثبت في الكرسي.

حاول يصرخ بس صوته ماطلعش من اللازقه اللي على بوقه!!

عدلت نفسى على السرير علشان أشوف الاوضه كلها واشوف مين اللى ربط آسر كده, بس مالقتش حد, كنت انا وآسر المربوط في الكرسي بس اللي في الاوضه.

بس لقيت جمبي على الكوميدينو الموبايل بتاعه, ومالقتش التسجيل الصغير!!!!

سمعت صوت حد بيجرى على السلم وطالع ناحية الاوضه.

خدت الموبايل بتاعه وحطيته تحت المخده.

باب الاوضه أتفتح ,فلقيت الكردى عرقان وبينهج جامد ,أول ماشاف آسر مربوط بص بأستغراب فعرفت أنه مش هو اللي ربط آسر!!

شافني على السرير وراسي مربوطه فقالي وهو ملهوف:

فيه أيه !!!؟ مين اللي عمل فيكي كده؟! .... مين اللي كتفه كده ؟! وليه !!؟

معرفتش أجاوب على كل أسئلة الكردى

قولته وأنا ببص بكل غل وكره على آسر:

أبن الكلب طلع بيخوني ... طلع صاحب آدم جوزى الاولاني وكان بيسجلي وعايز يعدمني وضريني أبن....

ممسكتش نفسى ونطيت من على السرير وقعدت ألطش بأيدى ورجلى في آسر اللى مربوط قدامى وأنا بقوله:

ياخاين يابن الكلب...

مسكني الكردي وشالني بدراع واحد وأنا برفس وبضرب في الهوا, وحطني على السرير.

طلع مسدسه وقالى:

عنك ياست البنات.

شد الاجزاء وكان هيضرب أسر

قولتله:

لا أوعى تقتله .... عايزه أعرف كل حاجه كان مخبيها عليا طول الفتره اللى فاتت دى , عايزه أعرف خدعنى أزاى!!

عذبه ياكردى لحد مايقر ويعترف.

نزل الكردي المسدس وقالي:

معلش یاست البنات لو عایزانی أقتله ماشی, أنما أعذبه مش هینفع ,مبعذبش بنی آدم ولا حیوان.

وبص على آسر وقالى:

أسف ياهانم

أنفعلت على الكردى وقولته:

ودى كمان أمك وصيتك ماتعملهاش ؟!!!

قالى:

معلش ياهانم.

قولتله:

شوفلي حد من الرجاله بتوعك يعذبه لحد مايقر ... ولا كمان ده مش سلوكم.

قالى:

لا عادى الرجاله بيعذبوا عادى .... بصى هجيبلك واحد من الاخر ... أبو بشله .. مانت

تعرفیه اللی هو مرسوم موزه فی وش.....

أنفعلت على الكردى وزعقتله وانا بقول:

أخلص ياكردى هات أبو شله ده بسرعه.

طلع موبايله وقعد يدور على رقمه وهو بيقولى:

أسمه أبو بشله ... مش شله

بصتله بنفاذ صبر, فرفع الموبايل وقال:

أيوه يا أبو بشله تيجيلي حالا الفيلا ..... فيلا الست هانم اه حالا وهات معاك الاجاصه

هتحتاجها

وقفل التليفون

قولتله بأندهاش:

أيه الاجاصه دى!!

قالى:

حاجه وحشه أوى ياست هانم لما يجى أبو بشله هتشوفيها.

قولتله:

طيب أطلع بره!!

بصلى بأستغراب

فقولتله بعصبيه:

أتفضل أطلع بره لحد ما أغير هدومي!!!

قالى وهو بيعتذر:

آسف ياهانم .... أقسم بالله ورحمة أمى ماخدت بالى.

وخرج بره فغيرت الزفت اللى كنت لابساه للمقرف اللى مربوط جمبى, ولبست بنطلون وتيشرت وخدت موبايله حطيته في جيبى.

أبو بشله جه بعد ساعه وفي أيده حاجه عامله زى دراع حديد في آخره قطعه زى ثمرة الرجاص وبتتفتح وتتفقل زى الورده وجوه الورده دى أبره رفيعه!!

قولت لابو بشلة بأستغراب:

أيه دى ؟!!

ضحك أبو بشلة ضحكه كلها بلغم وقالى:

دى الاجاصه ياست هانم بنحطها في حته لامؤاخذه و نعمل كده

ولف الدراع ففتحت الورده على أخرها, وبعدين لف الناحيه التانيه فقفلت تاني!!

قولتله:

ودى هتجيب نتيجه سربعه.

قالى بثقه:

عيب ياهانم أتفضلي مع المعلم كردي بره الاوضه وأنا عشر دقايق وهناديكم بعد مايستوي.

```
قولتله:
```

لا بليز انا عايزه اشوف هتعمل أيه.

قالى:

مينفعش ياهانم أستحاله.

قولتله:

ليه أنا عايزه اتفرج.

قالى:

مینفعش یاهانم انا هقلعه.

قولتله:

أمممممم . طيب أوكي عشر دقايق والاقيه بيقر على كل حاجه.

بصيت لآسر اللي كان مرعوب من بصات أبو بشله ليه.

وخرجت انا والكردى وأستنينا بره الاوضه لحد مايخلص أبو بشله.

الكردى طلع سيجاره .. فشاورتله يجيب واحده ليا.

أدهالي بأستغراب وولعهالي.

قولتله وأنا بكح من أول نفس خدته من السيجاره.

أزاى بتقتل ومعندكش قلب تعذب!!؟

قالى:

مش حكاية قلب ,أنا مبحبش عذاب النفس للنفس , ممكن اقتل وبشوفها انى قدر ربنا للناس اللي بتموت على أيدى.

سمعنا صوت أسر وهو بيصرخ جامد جوه وبيترجي أبو بشله يوقف.

خد نفس من سيجارته و كمل كلامه وقال:

ريس العصابه اللى كان قبلى ... قيصر.... كان مفترى وكان بيدك بنبوته راس أى حد يعارضه , ويبفشها كانه بيفش فحل بصل .. كان بيعذب عمه علشان خانه ولبسه طوق زى الكلب وحكم عليه يهوهو ومايتكلمش وياكل العضم ويمشى على كيعان رجله .. كان بيصعب عليا أوى عمه...

قلبنا على قيصر وقتلناه .. قتلنا ريسنا .. أول حاجه عملتها بعد ما أقتلناه جريت على عمه فكيت الطوق اللي على رقبته.

خد أخر نفس من سيجارته ورماها على الارض وداسها برجله وأبتسم وقال:

تصدق أن صمد اللى هو عم قيصر ...هو اللى عاش فى الاخر لا وكمان بقى مليونير وسافر بره مصر ,لما كنتى بتكلمينى كنت بأمنله صفقه بتاع كده أسموه كلور فيل باين , بتاع غالى أوى باعه وتلاقيه دلوقتى فى الطياره وخلع ... سبحانه..

```
قولتله:
```

أنت غريب أوى ياكردى ميكس عجيب , أها صح .. أنا مش شايفه في أيدك دبله أنت مش متجوز , صح ؟!

قال:

هو فيه واحده ترضى تتجوز واحد محكوم عليه بالاعدام مرتين غيابي ؟!!

فيه في رجالتي متجوزين .. بس مابيشوفوش مراتتهم ولا حتى عيالهم الاكل كام سنه وفي الخفا , عيشه مارضهاش لعيالي ولا أرضاها لنفسي.

قولتله:

بس....

قطع كلامي صوت ابو بشله اللي فتح باب الاوضه وقال:

الزبون أستوى ومستعد يحكى كل حاجه.

دخلت لقيت آسر متكتف برده في الكرسي بس مربوط ربطه تانيه وبوقه مش متكمم.

بصتله وقولته:

أحكى ... قول اللي حصل.

ماردش عليا رأبو بشله زام عليه وهو بيشاورله بالاجاصه.

فقال وهو مرعوب:

خلاص هقول...لما آدم مات, هایدی أخته وخطیبی، شکت أنك قتلتیه, خاصة أنه مكانش بیحبك وكان على طول بیقولها انك مجنونه وبیخاف منك.

راقبناكی وشوفنا أفعالك اللی مش مظبوطه, واجوازك اللی علی طول بتغیریهم بعد مایختفوا ,فأتأكدنا انك ورا موضوع آدم.

وخططنا نوقعك أزاى..

كنا عايزين كل حاجه تيجي بالصدفه وتبقى محبوكه علشان ماتشكيش فيا.

أول حاجه أخترقت شركة أبوكي...

وطلعت كل الثغرات اللي في سيستم الشركه وروحتله, وقولته على الثغرات اللي عنده في سيستم الشركه....

كنت متأكد انه هيطلب منى انه يعينى فى الشركه بعد ما اثبتله أنى أقوى من كل المهندسين اللى عنده.

بعد كده أخترقت الواى فاى بتاع الفيلا بتاعتكم...

وبعتلك فيرس في نفس الوقت اللي كنت فيه عند باباكي في المكتب بعرض عليه تحديث جديد للسيستم...

علشان مايبعتش حد غيري الفيلا.

وجیتلك وكنت خایف اوی تكشفینی أو متعجبیش بیا ... خاصة أن هایدی قالتی أنك مكاره و خبیته ومش سهله.

نجحت فى أنى ألفت أنتباهك وعرفت أنك مهتمة بعلم نفس .. حفظت كلمتين وأقنعتك أنى بحضر دكتوراه علشان يبقى فيه بينا حاجات مشتركه.

لما جرجرتيني لعصابتك .. عرفت أنك عملتي كده مع أدم وقتلتيه لما جرى وسابك.

قولت لهایدی علی کل اللی حصل وقالتلی أراقبك لانك أکید هتقابلی حد من عصابتك بعد اللی حصل .... والفکره کانت انی أقفشك معاه فتیجی تستعطفینی أسامحك... وساعتها أشرط علیکی تحکیلی کل حاجه علشان أسامحك وبالفعل حصل.

المشكله أنى تقلت بزياده فكنتي هتموتي نفسك قبل ما نسلمك للبوليس ونفضحك.

قولتله وأنا بلطش فيه:

أها يولاد الكلب، وانا اللي صدقتك والحب عماني و مخلنيش اشوف كدبك يا واطي.

شالني الكردى برده وبعدني عنه وهو بيقول:

```
خلاص كده ..... نخلص ؟!!
```

قولتله:

أنت مش سامع ياكردى تخلص أيه !!!... بيقولك هايدى أخت آدم تعرف كل حاجه.

مش هينفع نموته ومش هينفع نسيبه.

قال الكردى:

مش فاهم يعنى .. نموته نص نص!!!

فكرت شويه وقولتله صح نص .. نص

طلعت موبایل آسر من جیبی وقولتله:

قول باسورد المويايل والايميل بتاعك.

تردد وبعدين لقى أبوبشله وهو بيفتح الاجاصه وبيقوله:

أنطق جات على دى!!!

فقال وهو متردد:

الباسورد بتاع الموبايل 5/11/ 2011

الباسورد بتاع الايميل أسر لاف هايدي \_2011

قولتله:

اه ياخاين ياوقح...

فتحت مويايله وبعت رساله لهايدي قولتلها فيها:

"هايدى حبيبى ... الموضوع هياخد وقت شويه , أنا هقفل الموبايل ومتحاوليش تتواصلى معايا خالص الفتره اللي جايه دى, علشان الخبيثه دى ماتشكش في حاجه"

وفتحت الايميل بتاعه وبعت رساله للشغل قولتلهم فيها:

"أجازه طارئه ومفتوحه , السبب حالة وفاه , يرجى عدم التواصل طوال الفتره القادمه"

بعدها رميت موبايله على الارض وكسرته برجلي.

بصيت لاسر وقولته:

تعبت انت من الأجاصه .... بس ده عذاب عادى زى أى عذاب جسدى .. بيوجع شويه وبعد كده الوجع بيروح ...... لعب عيال ده ...... وده مايجيش حاجه جنب عذاب كارمن وأنتقامها.

بصيت للكردى وقولتله:

انا هفرمته زى الهارد.. هخليه ينسى كل حاجة!!!

بصلى الكردى وهو مش فاهم حاجه.

قولتله:

```
تعالا ورايا.
```

مشى الكردى ورايا .. ففتحت أوضه في الفيلا فيها حمام صغير وقولتله:

خلى الرجاله بتوعك يفضوا الاوضه دى خالص, ويدهنوا كل الاوضه أبيض .... أبيض خالص

.

تدهنوها 5 وشوش باللون الابيض والباب تغيروه وتجيبوا باب بشراع صغيره خالص من تحت يدخل بس طبق آكل وتدهونه برده باللون الابيض.

والاضاءة بتاعة الاوضه تتغير بلمبات نيون بيضه وتعزلوا الصوت عن الاوضه بالفليين الابيض.

وتجيب جلابيه لونها أبيض خالص مفياش أى لون تانى حتى الزراير بتاعتها يكون لونها أبيض

.

#### قالى:

مش فاهم ياست هانم ليه البياض ده كله !!؟

قولتله:

تعرف التعذيب باللون الابيض!!

قالى:

```
يعنى أيه ؟!!
```

قولتله:

دى حاجة وحشه خالص ياكردى, هتشوفها لما تعملوا اللي قولتلكم عليه.

فى أقل من يومين كانت الاوضه جاهزه, أتاكدت أن الاوضه مفيهاش أى لون تانى غير الابيض و أن مفيش أى صوت داخل للأوضه من بره.

قالى الكردى في فضول:

ماتفهمینی بقی یاست هانم هتعملی أیه ؟!!!

قلتله:

بص یاکردی.....

تصور نفسك محبوس في أوضه مابتسمعش فيها أى صوت غير صوتك بس!!

مفيهاش ألوان خالص, مفيهاش غير اللون الابيض بس, لبسك أبيض, الاكل اللى بتاكله من غير ملح ومالوش طعم و لونه أبيض....

رز وبياض بيضه ,حتى البي بي بتاعك هيبقي لونه أبيض.

في أول كام يوم ممكن تحس أن الموضوع مريح نفسيا, بعد كده بيبدأ العذاب.

بتبدأ تفقد أدراكك الحسى بكل حاجه, بتفقد حواسك كلها, لأننا شيلنا أى محفز لحواسك ولغيناه.

محفزات الصوت واللون والتذوق.

بعدها بفتره بتجيلك حالة زعر وهلوسه وقلق شديد ودايم , و مابتقدرش تميز أيه الحقيقى وأيه اللي مش حقيقي , وشوش البني آدمين مش هتقدر تميزها من بعضها.

بتبدأ تفقد هويتك وبتنسى أهلك ربتنسى حياتك ربتنسى أنت مين أصلا.

وأستحاله ترجع لطبيعتك تاني!!!

أنا همسح ذاكرة آسر وهمسح معاها كل اللي عملناه .. هخليه يتجنن.

ساعتها هيبقي قتلناه نص نص زي مابتقول, هيموت وهو حي!!

بصلى الكردى وحسيت لاول مره أنه خايف منى وشايفني مجنونه!!!

دخلنا آسر الاوضه ,وأشرفت على عملية تعذيبه بنفسي

كنت كل يوم بحطله الرز الابيض من الشراع اللي تحت الباب , وأقعد أسمع أنشودتي على موبايلي.

أنا القمر اللي جلى ضلمة .... وأنت الكسوف اللي رجعه....

وفضلت على الحال ده شهرين ونص, لحد ما في يوم رن جرس الباب وفتحته بنفسي.

أنيتا كانت واخد أسبوع أجازه وسافرت بره مصر تتطمن على أهلها, وكنت لوحدى في الفيلا.

لقيت واقف على باب بيتي ....هايدي!!!

كنت عارفه أنها هتيجي علشان تطمن على آسر و أتأخرت أوى..

شكلها طول الفتره دى كانت خايفه يكون كويس و تيجي هي وتبوظ كل حاجه!!

أول شافتني رسمت أبتسامه صفرا على وشها, وحكت أنفها

وهيا بتقول:

أزيك ياكارمن وحشتيني ... معقوله كده مبتسأليش علينا خالص بعد ما آدم مات ؟

قولتلها:

أزيك ياهايدي .... أتفضلي ... أتفضلي جوه.

دخلت وهي عينيها زايغه في الفيلا كلها وبتبص كأنها بتدورعلي حاجه, بتدور على آسر.

قعدتها في الرسيبشن وقولتلها:

تشربی حاجه...

قالتلى:

كلك زوق ... ممكن عصير.

قولتلها:

هعملك عصير برتقان فريش بنفسى .... أصل أنيتا واخده أسبوع أجازه بره مصر و راحت تشوف أهلها.

دقيقه وهكون عندك.

جريت بسرعه عملتلها العصير وانا عارفه انها مش هتشريه علشان هتفكره مسموم.

طلعت بالعصير لقيتها مش في الرسيبشن ,جريت على السلم وفي أيدى كوباية العصير اللي أتدلقت.

وروحت على الاوضه اللي فيها آسر.

لقيتها واقفه قدام باب الاوضه اللي شكله مختلف عن باقي أوض الفيلا وفيه شراع من تحت.

وبتقولى:

الاوضه دى فيها أيه ؟!!

قولتلها بعصبيه:

أنتى مالك ... أطلعي بره!!

وشها قلب وبقت عامله زى الحربايه اللي هتهجم.

و زعقت وهي بتقول:

وديتي آسر فين يابنت الكلب!! ... قتلتيه زى ماقتلتي أخويا ... افتحى الاوضه يا....

وهجمت عليا ... فحدفت عليها الكوبايه الازاز اللي كان فيها العصير, جات في راسها جامد واتكسرت كمان.

مسكت راسها اللى أتفتحت وبقت بتجيب دم وهى مذهوله, ولسه هتهجم عليا تانى رفصتها برجلى وقعت على الارض.

خدت نفسها وجريت من قدامي وهي حاطه أيديها على راسها اللي بتجيب دم, حاولت أجرى وراها محصلتهاش ومالحقتش أقول للأمن اللي على الفيلا يمسكوها.

كانت بتقول وهي بتجرى مني:

مش هسيبك يا واطيه يابنت الكلب.

طلعت التليفون بسرعه وكلمت الكردى وقولتله:

أنت فين يابني آدم أنت !!؟

قالى:

في البحر الاحمر بأمن شغلانه أنا والرجاله وراجعين بكره الصبح.

قولتله:

لازم تیجی بسرعه, هایدی أخت آدم كانت هنا وعرفت اننا حابسیین أسر.

قالى:

هدوس في الطريق ان شاء الله أكون عندك على الفجر.

حوالى الساعه 2 باليل, صحيت على صوت ضرب نارعامل زى المطر, بصيت من البلكونه لقيت بلطجيه كتير بيهجموا على الفيلا وبيشتبكوا مع الامن اللي بره.

هایدی أجرت بلطجیه!!

وقدروا يتغلبوا على أمن الفيلا الى بره ودلوقتى داخلين الفيلا ومعاهم رشاشات وأسلحه علشان يقتلوني و يهربوا آسر!!

كلمت الكردى في التليفون وقولتله وانا بصرخ:

ألحقني ياكردي ...هيموتوني!!!

الفصل السابع "صدمة"



الكردى قالى في التليفون:

أنا سايق على سرعة 170 فاضلى نص ساعه وأوصل, أهربي أو أستخب....

سمعت ضرب نار جوه الفيلا!!!

جريت قفلت عليا باب أوضى بالمفتاح..

قعدت أدور على قطى في الاوضه, وبنادى عليه:

باستیت ... باستیت

لقيته تحت سريرى, شيلته ورميته براحه من بلكونة الاوضه, مشى باستيت ولف دخل الفيلا.

شوفت بعينه كل اللي بيحصل جوه الفيلا..

شوفت حوالى 7 بلطجيه شايلين رشاشات, وواقفين فى الرسيبشن, واحد منهم تقريبا الريس بتاعهم, رفع التليفون على ودنه وقال:

أيوه ياهايدي هانم ... خلاص أحنا جو الفيلا ممكن تيجي دلوقتي من العربيه..

عدت دقيقه بالظبط وشوفت هايدى بعين قطى وهي بتجرى ناحية الفيلا.

أول مادخلت الفيلا جريت فوق وجريوا وراها.

قالتلهم:

هيا دى الاوضه أفتحوها, قعدوا كتير يكسروا باب الاوضه, لحد مانجحوا يكسروها

أول ما أتفتحت الاوضه , جريت هايدى جوه الاوضه.

فخليت قطى باستيت يمشى فوق درابزين السلم علشان أشوف كويس لأن البلطجيه كانوا سادين الباب. شوفت هايدي وهيا بتعيط و بتقرب من آسر اللي بيبعد عنها وخايف منها.

قالتله وهي بتعيط:

انا هايدي يا آسر وجيت علشان أخرجك.

قالها:

وهو مرعوب أنتوا مين ..... أنتوا ... أنتوا...

حاولت تلمسه ..بعد عنها وجرى في ركن الاوضه وهو بيصرخ ومرعوب منها.

بصتله وهي مش مصدقه اللي حصله!!!!

صرخت في البلطجيه وقالت:

هاتولى الكلبه دى حيه قدامي !!!!! يلالالالالالالالالا

قعدوا يكسرواكل بيبان الاوضه.

تليفوني رن!!!

سمعوه رنته فجريوا على أوضتي وقعدوا يكسروا في الباب بتاعها.

برمت ملايه وكنت عايزه أنط من البلكونه , بس كان فيه بلطجيه تانيين تحت البلكونة ..

وعند بوابة الفيلا!!!

كسروا الباب..فصرخت بصوت عالى وقعدت أستنجد.

3 شالونى فقعدت ألطش فيهم وأخربش فيهم, حاولوا يطلعونى بره الاوضه فمسكت في الباب المسكور و تشبثت فيه بأيدى

وبصيت جمبي

لقيت 3 بلطجيه تانين بيحاولوا يخرجوا آسر بره الاوضه وهو مش راضي يخرج من سجنه ومتشبث زيي بالظبط بالباب المكسور

فضلوا يضربونى على أيدى جامد لحد ماسيبت الباب من أيدى و وجرجرونى من شعرى على الارض ونزلونى تحت.

وشوفتهم وهما بيفكوا أيدى آسر وشايلينه هو كمان ومنزلينه تحت.

هایدی کانت قاعده علی کرسی فی رسیبشن الفیلا رمونی تحت رجلیها

شاطط وشي برجليها وهي بتقول:

ياو... ياواطيه.. أنا هخليكي تتمنى الموت يابن..

فجاه أتقطعت الكهربا على الفيلا, ومبقناش شايفين حاجه!!

واحد منهم شدني من على الارض وحط سكينه على رقبتي وزعق فيهم وقال:

حد يشوف من اللي فصل الكهربا بسرعه , وكل واحد يطلع كشاف موبايله وينور حو....

قطع كلامه لما سمع حد من عصابته صرخ صرخه وبعدين سكت!! فقال:

مين اللي صرخ من شوي....

قطع كلامه لما سمع صرخة واحد تاني وبعدين سكت خالص

أترعب و أيده اللي ماسكه السكينه على رقبتي بتترعش وقال:

کله یدی تمام أنه سلیم و موجو....

سمع صرخة واحد تالت من رجالته وبعدين سكت خالص!!!

النور رجع

فشوفت تلاته من البطجيه مدبوحين, ومش باقى غير 3 تانيين و فى وسطهم آسر فى عالم تانى.

ده غير اللي حاطط السكينه على رقبتي

كل البلطجيه وجهوا رشاشتهم ناحية الكردى اللى حاطط سنجته على رقبة هايدى وبيبص على اللي حاطط السكينه على رقبق وبيقوله:

مرعى!!! .... أنت مش كنت شغال في الدعاره ... مالك أنت ومال البلطجه ... تبدل ؟...

خد الاموره اللي تحت سنجتى وهات الهانم وأخلع.

مرعى اللي حاطط السكينه على رقبتي قاله:

الله!! .. جاى لوحدك يعنى ياكردى, امال فين رجالتك !!؟

قاله:

رجالتي دقيقه وهيبقوا هنا ..وبص عليه وعلى التلاته اللي معاه

وقاله وهو بيهدده:

بص يامرعي .. أو يا معرى ... زى ما كنا بناديلك ولا ناسى؟...!!

رجالتي عددهم أكتر من عدد رجالتك 4 مرات ولوجم ولقوك هنا هتتدبح أنت ورجالتك..

فأخلع أحسنلك.

رد مرعى عليه بصوت من انفه وتف على الارض وقاله:

خليهم يجوا وهيلاقوا جتتك متخرمه هنا...

وبص لرجالته اللي شدوا أجزاء رشاشتهم وأتهيئوا يضربوا الكردى!!

فالكردى قاله:

أيه مضحى برقبة السينيوره يعنى أدبح حلال الله أك...

الكردى عمل نفسه هيدبح هايدى

فقاله مرعى:

لو قتلتها .... هقتل اللي معايا!!

```
الكردى قال:
```

أنت غبى ياله مانا بقولك من الصبح تبدل ؟

خد صاحبتك وسيبلى الهانم ويادار مادخلك شر..

وبص على آسر وقاله:

وخد ده كمان معاك مش عايزينه خلاص

هنا صرخت هايدي وقالت لمرعى:

أقتلها .... أنا دفعالك علشان تقتلها .... سيبه يقتلني ... بس أهم حاجه هيا تموت

أقتلها!!!

أقتلها!!!!!!!!!!!!!!

مرعى قالها وهو بيحضر نفسه علشان يدبحنى:

بشوقك ياهايدى هانم وعلى أتفاقنا.

وبدأ يمشى بسكينته على رقبتي بس وقف!!!

وكله وقف وبص ناحية الباب اللي دخل منه

راجل لابس بدله

دخل بهدوء خالص وجرجر كرسى برتابه وبملل

ركله كان بيبصله بأندهاش, وفيه اللى كان موجهه رشاشه عليه, فضل يجرجر في الكرسى لحد مابقى في وسط الرسيبشن ومابينا!!

قعد على الكرسى وحط رجل على رجل وطلع سيجاره وولعها وخد نفس وبص لمرعى اللى حاطط السكينه على رقبتى وقاله وهو مبتسم:

سيب بنتى يامرعى وأمشى أنت ورجالتك وليكم الامان

مرعى كان هينفعل عليه وهيشتمه فحذره الكردى

وقاله:

أوعى.... ده ياسين باشا ,أهدى يامرعى الحوار كده كبر أوى أوى عليا وعليك .. أهدى يامرعى .. . ها .. أهدى

مكنتش عارفه أندهش من أيه !!!؟ أندهش من بابا اللى موجود هنا ولا أندهش من الكردى اللى طلع يعرف بابا!!!

نسيت صح أعرفك على بابا وليه مش هتلاقي صور ليه في اى حته .

بابا ياسين عوده بجانب شركاته والبيزنس بتاعه شغال في جهه سياديه عليا, علشان كده مش هتلاقي صوره ليه بتتنشر في الجرايد, وممكن مايكونش أسمه الحقيقة ياسين عوده أصلا, أنا

أعرف عن بابا حاجات كتير, حاجات أنا بس اللي أعرفها.

بابا ليه أوضة مكتب في الفيلا, حاطط فيها مقتنيات غريبه من كل القضايا اللي نجح فيها مثلا خنجر عليه دم, بيحفتظ بيه بدمه .. سيف عليه نقوش غريبه, كنت بشوفه دايما بعين قطى باستيت وهو بيحط الحاجات دى في أوضه مكتبه ويقفل المكتب بالمفتاح. أوضه فيها كل أسراره واللي دخلتها وعرفت عنه كل حاجه حتى أسمه الحركي في الجهاز " مستر أكس."

بص بابا على مرعى وشاورله على شباك من شبابيك الفيلا, فظهر ليزر أحمر على راس مرعى , وبعدها ظهر ليزر أحمر على راس كل واحد من عصابته, فعرفوا أنه فيه قناصه بره وممكن يقتلوهم في ثانيه!!!

بابا قال وهو مبتسم:

أنا مبكررش كلمتي مرتين.

كل رجالته اللي معاه سابوا رشاشاتهم وجربوا وسابوه لوحده!!

نزل السكينه من على رقبتى وأيده بتترعش وبص على هايدى وجرى وأتشنكل على الارض وهو بيجرى. بص بابا للكردى اللى حاطط سنجته على رقبة هايدى واللى كانت مرعوبه ومذهوله من اللى حصل.

وقاله:

سيبها ياكردى

هز راسه بالطاعه وسابها!!

بابا قال لهايدي وهو بيبص على أسر التايه:

بصى يابنتى قدامك حليين يا تخديه وتمشى وتنسى كل اللى حصل ..ياتموتى أنتى و هوه ونفضها سيره خالص.

وخد نفس من سيجارته وقال:

یکون فی علمك لو أختارتی تعیشی , وفكرتی ... بس فكرتی تأذی بنتی هخلیكی تتمنی الموت فی كل ثانیه.

وشخط فيها وقالها:

فاهمه!!!

جسمها كل أرتجف وراحت على آسر وسندته بصعوبه لحد ماخرجت بيه بره الفيلا.

بص لكردى وقاله:

روح أنت ... بس خليك بره أنت ورجالتك متبعدش.

هز الكردى راسه وقاله:

اللي تؤمر بيه يا باشا وخد نفسه وطلع بره.

أستغربت من رد فعل الكردي

فبصلى بابا وقالى:

هو أنتى كنت مفكره الكردى أتفق معاكى من ورايا !! الكردى سئل عليا وجالى الشركه وأدانى المليون جنيه اللى أدتهمله كأثبات لحسن النيه !! الكردى مابيعملش أتفاق مع حريم و أنا اللى وافقت وأتفقت معاه علشان يراقبك وبحميكى...

جاله تليفون فقطع كلامه ورد على التليفون وقال:

أها خلاص ... نزل العيال من السطح وادى لكل واحد 200 جنيه زياده .... مش مشكله اديهم الليزر يلعبوا بيه!!!!

قفل التليفون وقالى:

تعالى ورايا

روحت وراه ففتح أوضه المكتب بتاعته واول مادخلت لقيته قفل الباب و أنفعل عليا وقالى:

أنتى مش هتبطلى اللى بتعمليه ده!!!

قولته وأنا بعيط:

```
يابابا هما اللي خدعوني وخانو....
```

قطع كلامي وقالي بعصبيه:

ماهو بسبب اللي عملتيه في أدم!!

أستغربت أنه عارف موضوع آدم!!

فقالي:

هو أنتى مفكره انى مش عارف كل اللى بتعمليه!!

قولته وانا بزعق فيه:

كلهم خانوني وآدم خاني!! كلهم يستاهلوا الموت..

قالى:

وعرفتي منين أن آدم خانك !!؟

قولتله:

سمعته بودن قطى باستيت وشوفته بعينه وهو بيخوني..

قالى:

سمعتيه بأيه يختى ؟!!!

كان لازم أسمع كلام الشيخ

تعرفى قالى أيه .. ها ... قالى قصة سيدنا الخضر اللى قتل غلام صغير علشان بيرهق أبوه أمه وهيضلهم..

قالى أنك قتلتى اعز أنسان ليكى وانك هتقتلى ومش هتبطلى قتل لان ده علاجك الوحيد والحاجه الوحيده اللى بتهديكى!!!

ماسمعتش كلامه وطردته

بس كنت عارف أنه صادق وانك قتلتى اعز أنسان ليكي صديقتك ثريا

قولتله:

ثريا مين ؟!!

قالى:

حتى اعز صديقه ليكى نسيتيها, نسيتى ثريا اللى سممتيها وداريت على جريمتك, نسيتى سعاد الخدامه اللى طعنتيها بالسكينه في ضهرها وانتى بتقوليلها ياخاينه, قال أيه سمعتى أفكارها وعرفتى أنها بتخون جوزها مع البقال..

نسيتي عفاف الخدامه اللي جات بعدها وقتلتيها برده

كل ما أجيبلك خدامه تقتليها, لحد مابطلت أجيب خدم.

قولتله:

أنت كداب , أنيتا موجوده وعايشه معايا من وأنا صغيره.

قالى وهو بيحاول يهدى نفسه ومينفعلش:

الدكاترة نصحونی موجهكیش بالحقیقة بس انا لازم اوجهك بیها علشان تعبت خلاص وجبت آخری و یمكن صدمتها تعقلك,

انتى مريضة محدش قدر يشخص حالتك, كان اقرب تفسير لتصرفاتك انك مريضة ذهان, فشلت انى اعالجك بعد ما وديتك لاحسن دكاترة فى العالم كان مفروض تعيشى فى مصحة ..... بس كنت همحى تاريخى ومستقبلى بأستيكه, كانوا هيقولوا بنت ياسين عوده مجنونه .....

حاولت أحبسك ...بس كنتى كل مره بتحاولى تنتحرى , وقلبى مجابنيش أقتلك وأخلص منك. ماقدرتش أوقف الغول اللى جواكى , داريت على كل جرايمك وبقيت شريك معاكى فيها. طول عمرك سفاحه ومجنونه وانا كان لازم اغزى الغول اللى جواكى علشان تعيشى. حالتك أتحسنت لوحدها فتره و أتحسنت أكتر لما أتجوزتى آدم وأنبهرت أنك كنتى طبيعيه الفتره اللى أتجوزتيه فيها فعرفت أنك ممكن يكون ليكى علاج تانى وهو أنك تلاقى حد تحبيه. أى حد جالى علشان يتقدملك عرفته حالتك , فيه اللى رفض, وفيه اللى وافق يتجوزك بحالتك دى ودول فيه منهم اللى كان صريح معايا زى آدم اللى تراجع عن فكرة أنه يتجوزك لما عرف حالتك , وبعدها بيومين, جالى وعمل صفقه دنيئه بس وافقت عليها.

وهو انه يتجوزك في مقابل انه اساعده بعلاقاتي يوصل ويبقى كاتب كبير.

وافقت, بس أنتى قتلتيه زى ماقتلتى غيره, ومعرفتش أمنعك لانك بعد ماتوهمتى خيانة آدم ليكى جاتلك نوبات الصرع تانى وأشد وكنت بتموتى منى

كان لازم اغزى الغول اللي جواكي علشان تعيشي.

لحد ما جيه اسر وساعتها قلت خلاص مشكلتك اتحلت وعقلتى بس للاسف طلع بيلعب علينا كلنا عشان ينتقم لادم واضطريت اتدخل لما لقيته سجلك كل حاجة و هيوديكى في داهية ضربته واخدت التسجيل.

أنا سفاح زيك عشان سيبتك تقتليهم وان مكنتش سيبتك تقتليهم كانت حالتك هتسوء انتى سفاحة بتتغذى بالقتل.

أنا خونت وظيفتي وخونت شرفي المهني.

أنا هربت من العداله سفاح و قاتل زيك علشان ماقدرتش اعاقبه و احاسبه وهو عنده دوافع منطقية للقتل, كان الاولى عاقبتك أنتى وعاقبت نفسى على الناس اللى قتلتيهم من غير ذنب

صرخت فيه وقولته:

أنت كداب كل اللى بتقوله كدب, ومتستاهلش اللى عملته علشانك, تستاهل الخيانه, تستاهل خيانة ماما ليك مع السفرجي.

بصلى بأندهاش وقالى:

ماما !!؟ سفرجي أيه !!؟

قولتله بغل:

ماما كانت بتخونك مع السفرجي وانا اللي زقيتها من فوق الرووف علشان أغسل شرفك

وخبيت عليك عشان مجرحكش , مش زى ما انت بتجرحني دلوقتي وبتقول عليا مجنونة!!

قالى وهو مصدوم وبيحاول يفهم:

أنتى اللي رميتي أمك من فوق رووف الفيلا!!؟ مش هي اللي وقعت لوحدها!!؟

قولتله:

اها أنا اللي قتلتها وانت متستهالش اللي عملته علشانك.

أنفعل ونزل فيا ضرب بأيده وهو بيقولى:

قتلتى امك يامجنونه يا بنت الكلب!!!, أحنا عمر ماكان عندنا سفرجى يا مجنونه!!!

قولتله وأنا بصرخ:

أنت اللي مجنون بقولك شوفتهم بعين قطى باستيت وهما بيخونك فوق السف.....

سابنى وطلع بره وشويه ورجع وهو ماسك باستيت ورماه جمبى على الارض وفتح الدرج بتاعه مكتبه وطلع مسدسه وهو بيقول:

كان لازم اسمع كلام الشيخ..

وضرب باستيت بالنار!!!

صرخت بصوت عالى وجاتلى نوبة صرع بعدها أغمى عليا.

فوقت وفتحت عينى لقيت بابا نايم على الارض وجمبه عصايا خشب تخينه وراسه بتجيب دم جامد.

قومت مفزوعه من مكاني وبصيت عليه لقيت جمجمته مكسوره!!!

قعدت أهز فيه وأنا بصرخ وبعيط وبنادى على الكردى

اللى جه جرى ناحية أوضة المكتب وبص عليا وعلى بابا وعلى العصايه التخينه وقال وهو وهو مندهش:

أيه اللي جاب نبوت قيصر هنا!!!!

قولتله وانا بصرخ فيه:

ألحق بابا بسرعة

حط أيده على بوقه مالقاش نفس طالع, قالى .:

مات!!

قولتله وانا بصرخ:

مات !!! مات ازاى !! مين اللي قتله!!

لف بعينه في الاوضه وشاورلي على كاميرا متعلقه على الحيطة.

جريت على مكتب بابا وفتحت الاب توب بتاعه و شوفت تسجيل كاميره المكتب

واتصدمت من اللي شفته..

شوفت بابا وهو مدینی ضهره بعد ماقتل باستیت..

شوفتني وأنا باخد نبوت من ركن الاوضه وبخبط راسه من ورا وبضريه لحد ما مات!!!

بدئت اشوف ادامي مشاهد كتير .. مشاهد للحقيقة اللي بدئت تنكشفلي.

أنا اللى قتلت بابا ... زى ما قتلت ماما ... زى ماقتلت صاحبتى .. وقتلت كل اللى حواليا وانا بتوهم انهم بيخونوا..

صرخت في الكردى وطردته بره الاوضه وقفلت الباب وشغلت أنشودتي

### الفصل الثامن

## "الكردى"



شوفتها فى الكاميرات وهى بتقتل أبوها بنبوت قيصر, ريس العصابه اللى قبلى واللى كان بيدك بنبوته اى حد يعارضه.

طردتني بره الاوضه وحبست نفسها جوه.

بس فضلت على الباب مارضتش أمشى , وقعدت على الارض وسندت ضهرى على بابها كنت بخبط عليها كل شويه , وكنت بسمع صوتها وهي بتزعقلي وبتشتمني هي بتقول:

سيبني .... أمشى .... بطل تخبيط مش عارفه أسمع أنشودتي!!!

انا عارف انها مجنونه, ومكنش فيه صوت لا أنشوده ولا أغنيه شغال في الاوضه!!

فضلت مستنى على الباب, كذا ساعة

لحد ماخبطت عليها ولقيتها مابتردش عليا ولا بتزعقلي , خبطت جامد مردتش برده!!

كسرت باب الاوضه ودخلت لقيتها مقطعه شرايين أيديها بالسكينه والدم حواليها

جريت عليها ودموعي سبقاني وبقولها:

ليه كدايا ست البنات!!!!

شيلتها وجريت بيها

قالت بصوت ضعيف:

هو انت حقیقی یا کردی ؟!!!

قولتلها وانا بجرى بيها:

انا حقيقي ومعاكي ومش هسيبك تموتي.

قالتلى:

أنت بتحبني ياكردي ؟!

قولتلها وانا بعيط و ببصلها:

عمرى ماحبيت في حياتي غيرك ... من أول يوم شوفتك فيه من أول مرة لمستك فيها..

قالت بصوت ضعيف:

أنا غبيه عمرى ماشوفت الحقيقه ...... دورت على الحب والاخلاص وماشوفتكش .. خونت كل اللي حواليا وكنت مفكراهم هما اللي خاينين...

صوتها قطع , حطيتها في العربيه وجربيت بيها على المستشفى وانا مش شايف الطريق من الدموع الى في عيني قولتلها:

مش هسیبك تموتی .... لازم تعیشی .... ورحمة أمی ماحبیت فی حیاتی قد ماحبیتك .... ورحمة أمی ماهسیبك تموتی ولو هدیكی روحی.

نفسها كان قاطع لما وصلت بيها المستشفى, جريت وانا شيلها فى وسط المستشفى زى المجنون, وبصرخ بعلو صوتى وأنا بقول:

دكتورررر .. دكتور بسرعه ياولاد الكلب هتموت مني .... هتموت مني .... ألحقوني!!

جرى عليا دكتور وكام تمرجي وخلاوني أدخلها الطوارئ ... طلبوا مني أخرج بره

أتخناقت معاه, قرب منى دكتور وقالى:

وجودك هنا هيضرها أتفضل حضرتك ادى بياناتك في رسيبشن المستشفى.

أفتكرت أنى محكوم عليا بالاعدام مرتين, وممكن أتمسك حالا وساعتها مش هعرف أطمن عليها.

كلمت واحد صاحبى مش سوابق وخليته يجى يحط بياناته ويطمن عليها ويطمنى عليها, القلق كان ساحب روحى والحمد لله عرفت انها عاشت..

روحی رجعتلی تانی بعد ماکانت أتسحبت منی.

البوليس جه المستشفى بعد مالقوا جثة أبوها فى المكتب, وشافوها فى الكاميرات وهيا بتقتله وكلبشوها فى السربر لحد ماخفت.

بعد كده ا حبسوها في مستشفى العباسيه بعد ماعرفوا انها مجنونه, عرفت انهم حبسوها في أوضه زى الى كانت حابسه فيها آسر علشان يهدوها بعد مافشلت جلسات الكهربا في انها تعالجها.

كل الكلام ده عرفته لما دفعت رشوه لدكتور من اللى شغالين هناك علشان يطمنى عليها وينقلى أخبارها, ساعات كان بيدخلنى باليل أشوفها وأطمن عليها.

کانت نسیانی وناسیه هیا مین وناسیه کل حاجه, بس لما کانت بتشوفنی کانت بتفرح اوی و بتقول:

أبو جاكيت جلد جه أهوه!!!

# تمت بحمد الله

للتواصل مع الكاتبة

Linabasyouni20@gmail.com

# اعراض الذهان

- سماع أو مشاهدة أشياء لا يحس بها الآخرون.
- ترى أشخاصًا أو أشياء غير موجودة ، أو تعتقد أن شكل الأشياء يبدو خاطئًا.
  - الاعتقاد بأن لديك قوى خاصة.
  - التوهم بسماع الأصوات أو موسيقى غير موجوده.